

# WANTOK

NIUSPEPA BILONG YUM OL PAPUA NIUGINI STRETI - 27 YIA NAU

24 pes      Namba 1,212      Wik i stat long Fonde Septemba 18, 1997      50 toea

## KANAGE

**bilong dispela wik**



■ Kanage i bilong ples Genzictonao long Apa Mape eria bilong Finsafen, Morobe provins. Meri sik na ol kisim em i go long haus sik. Tupela de bihain trangu Misis Kanage i dai. Kanage sore nogut tru.

Ol krai i go na na long apinun ol karim bodi i go kamap long matmat long planim. Taim ol pasim kofin long rop na lusim isi isi i go daun long graun. Kanage krai wantaim na holimpasim kofin strong stret. Trangu em krai na toktok wantaim: "Plis larim meri lewa bilong mi i stap".

Trangu liklik tambu meri lukim olsem na sore nogut tru long Kanage. Em krai wantaim i go holimpasim Kanage na tok: "Tambu! Bikpela i dai tasol liklik bilong em, mi stap."

Kanage harim olsem na stap long krai. Em pusim kofin i go daun na tanim holimpasim liklik tambu meri na tok: "Olsem na planim em hariap".

Leonard Kewoing  
Amoko Village  
FINSAFEN

# Bus paia long ol drai ples bringim moa hevi

## LEO WAFIWA i raitim

OL PIPEL bilong Papua Niugini i save laikim tru long mekim paia. Taim ol lukim wanpela hap eria i gat drai gras samting, ol bai mekim paia tasol. Olsem na dispela em wanpela bikpela birua, em ol pipel i mas kisim luksave long dispela taim, we planti eria i drai na stap bikos long hotpela san.

Olsem na sapos ol pipel i bihainim wankain pasin na mekim paia nabaut long laik bilong ol, dispela i ken kamapim moa bikpela bagarap antap long laip na sindaun bilong planti pipel.

Nau yet i gat ripot long paia i kamap long sampela eria bilong kantri, we ples i drai, na kukim nabaut ol gaden kaikai, propeti, na samting olsem. Dispela i kamapim kros pait namel long ol pipel.

Las wik tasol ol pipel long is kos bilong Nu Ailan provins i kisim taim long bikpela paia tru, we i bagarapim gaden kaikai na bus bilong ol. Long rot bihainim haiwe long is kos, olgeta diwai kokonas na kaikai i pinis long bus paia. Paia ya i stap yet. Na nogat man long save long paia i kamap olsem wanem.

Long sampela eria long wes kos bilong provins, paia i kamap tu. Tasol ol bikman i bungim ol

pipel, na nau ol i traim long stapim dispela paia (lukim ful ripot long pes 3).

Insait long Isten Hailans provins, ples Geharoka long Kefamo, ausait tasol long Goroka taim i lusim 4-pela haus na sampela propeti. Mekim na 4-pela famili i kisim taim nau.

Long tupela wik i go pinis, sampela man i mekim paia long drai gras. Paia i stat 100 mita samting longwe long ol haus. Tasol kwiktam em kisim 4-pela haus kunai, na kukim i go daun.

Wanpela plesman, Joe Losea, i tok laki tru na 4-pela famili i no stap long haus taim birua i kamap. Em i kos bilong ol bagarap i winim K1,000.

Losea i tok moa olsem bikpela birua inap long kamap long olgeta haus sapos em wantaim ol wantok i no stapim paia kwik taim.

Long Sauten Hailans provins, ol pipel bilong tupela ples i pait bikos long paia tasol. Pait ya i kamap bihain long sampela man bilong wanpela ples i mekim paia, na kukim diwai kopi long wanpela gaden.


Ripot i tok sampela man long Kurelkai-Narelkai na Melpa-Alkai i sut long ston i go i kam long wanpela aua samting long las wik Trinde, bipo ol plisman i kamap na stapim.

*i go moa long pes 4*

## INSAIT LONG DISPELA WIK

- Gavman putim VAT takis long arere - p2
- PNGRFL saspensim Ben Bire - p24


- NKS WIK: Palamen Kabung Ripot
- Cambridge Kap Camm Bal Resis - p24



### Tingim independens wantaim tumbuna pasin

• Ol yangpela sumatin bilong Madang Intanesenel skul i a m a m a s i m independens long las wiken wantaim tumbuna bilas na danis. Prinsipel bilong skul, Mista Pat Walker tokim ol papamama olsem bikpela samting long laip bilong ol pikinini em long lainim tumbuna pasin bilong ol.

*Poto: Robert Kaia.*



# MUTRUS

MAJOR SPONSA BILONG RAGBI LEAGUE INSAIT LONG PAPUA NIUGINI

GOVERNMENT WARNING: SMOKING IS DANGEROUS TO HEALTH



**Plis  
RIPOT**



**Mosbi NCD:**

TUPELA sekyuriti gad i dai pinis bihain long sampela man nogut i kilim ol.

Birua ya i bin kamap long Touaguba Hil long las Sarere.

Long sem de tu, ol bin painim bodi bilong wanpela meri ol i kilim pinis na i dai stap klostu long ples bilong pilai golp long Mosbi golp kos. Dispela em long las Sarere. Plis i bilip olsem sampela lain i bagarapim na kilim dai meri ya long Sarere.

Long wankain taim tu, wanpela plis sajan i bin dai long las Fraide taim haus bilong em i paia. Dispela birua i bin kamap long Gerehu long nait taim plisman i slip i stap. Plis i bilip olsem sampela lain i bin wokim paia we i kilim dai plisman ya. Plisman i save stap long praivet haus bilong em yet long Gerehu Stej 3. Em i save wok wantaim plis fosinik yunit.

Bos bilong ol plisman long Nesenel Kapitel Distrik na Sentrel provins Sam Inguba i tok ol bin kilim dai tupela sekyuriti gad long haus bilong Katolik Asdaiosis long Touaguba Hil namel long 1 na 6 kilok moning long Sarere.

Sampela lain i stap klostu long dispela haus i bin ripotim olsem em i lukim tupela man i kalapim banis long dispela taim birua i kamap.

Klina i bin painim bodi bilong tupela sekyuriti long ples bilong wasim klos taim em i go wok long moning.

Mista Inguba i tok ol birua bilong ol i bin taitim bodi bilong tupela man na katim nek bilong ol wantaim wanpela sap samting.

Krismas bilong dispela meri we ol i painim i dai klostu long Mosbi golp kosem i stap namel long 35 na 40.

Plis i bilip olsem sampela lain i bin bagarapim na kilim em i dai long samting olsem 1 kilok apin-un.

**Lae, Morobe:**

SAMPELA lain nogut i bin bagarapim tupela yangpela meri long Lae las wiken, plis i tok. Long wankain taim tu, ol stilain i wokim pasin long hensapim man na stil long ol. Ol bin brukim wanpela stoa na stil tu long em. Long narapela, boipren i bin bagarapim yangpela gelpren bilong em taim em i pulim em i go long bus klostu long Kapiak Strit long Lae las wiken.

Ripot i tok siksapela pren bilong manki i bin bagarapim tu meri.

Sampela stilman i hensapim manesa na namba tu bilong Lae Book Makers na stilim moa long K20,000 kesmani long ol. Ol bin wokim dispela long ol taim ol i laik go benkim mani long dispela wik.

Plis i ripotim olsem foapela raskol i bin hait wetim ol na taim tupela man i kamaut long opis na go insait long ka, ol i pulim ol aut, stilim mani na ranawe. Plis i holim pasim pinis foapela man long stap insait long dispela stilpasin.

**Bil bilong Bogenvil Trensisenel Gavman bai sot long 6-pela vot**

GAVMAN bai i no inap kisim inap vot long skruim taim bilong Bogenvil Trensisenel Gavman (BTG), taim Palamen i bung long neks wik, stat long Tunde Septemba 23.

**LEO WAFIWA** i raitim

Oposisen Lida, Bernard Narokobi, i tokaut strong long las wik olsem olgeta 30 memba bilong Oposisen i no inap long vot wantaim gavman long dispela bil. Bikos em i laikim taim bilong BTG long pinis long Desemba 31, 1997. Na ol pipel i votim stretpela na trupela lida long makim ol long toktok bilong bringim bek gutpela sindaun na amamas long ailan. Na tu rijonal memba John Momis i ken kamap Gavana bilong provins.

Sapos olgeta Oposisen memba i sanap bihain long lida bilong ol, dispela min olsem 78 memba bilong gavman tasol i no inap long mekim dispela bil i senisim Ogenik Lo bilong Provinsal Gavman long skruim taim bilong BTG.

Bikos dispela bil mas kisim sapot bilong 84 vot long mekim senis long lo. Na BTG i ken stap long 12-pela moa mun. De bilong BTG bai pinis long Desemba 31, 1997 bihain long 4-pela yia olgeta. Dispela min olsem long Janueri 1998, Bogenvil bai kam aninit nau long rifom, bihainim Ogenik Lo long Provinsal Gavman, we ol pipel bai makim ol lida olsem ol arapela provins. Nau yet em ol lida bilong BTG em gavman i makim, olsem primia Gerard Sinato.

Minista bilong Provinsal Afeas na Lokol Level Gavman, Simon Kaumi, i bin putim wanpela sabmisen o askim pepa i go pinis long kabinet long skruim taim bilong BTG. I gat bilip olsem kabinet, oraitim pinis dispela askim na redi nau long karim i go long Palamen olsem wanpela bil. Bikos Palamen tasol i ken mekim disisen long dispela.

Mista Narokobi i tok strong olsem gavman i mas larim taim bilong BTG i pinis long Desemba 31, 1997. Na larim ol mausman, husat em ol pipel i votim long nesenel ileksen i go pas, na skruim toktok wantaim Bogenvil Revolusinari Ami (BRA), Bogenvil Interim Gavman, na PNG gavman long bringim bek gutpela sindaun long ailan.

**BRA sapatim Burnham Dikleresen long kamapim gutpela sindaun**

OL REBEL paitman bilong Revolusinari Ami (BRA) long Not Bogenvil i sapatim Burnham Dikleresen o tokorait, na ol i laikim ol wok long gutpela sindaun we i wok long kamap nau long Bogenvil long go het gut. Na nogat grup i mas bagarapim.

Ol i givim sapot bilong ol insait long wanpela bung we ol i bin holim long Tsunpets eria long Selau, not Bogenvil. Ol Bogenvil Trensisenel Gavman (BTG) memba, pablik sevan, sios woka, BRA, ol pis komiti memba na pipel long eria i bin stap insait long dispela bung.

Eddie Mohin i bin makim ol BRA long not Bogenvil long ol toktok we ol Bogenvil lida i bin holim long Nu Silan tupela mun i go pinis.

Mista Mohin i bin tok ol toktok we i stap insait long wanpela agrimen pepa ol i kolim long Burnham Dikleresen em ol ansa tru long ol prea i kam long ol mama, husat i lusim pikinini bilong ol long 9-pela yia olgeta taim hevi stap long Bogenvil. Na tu bikos long prea bilong ol Kristen manmeri long Bogenvil na PNG.

"Bihain tasol mipela i kam bek long Nu Silan, yumi wok long toktok na skulim ol pipel long rot bilong kamapim bek gutpela sindaun long ailan, bihainim ol tokorait i stap insait long Bu rnham



**Tupela yangpela skul meri long Mosbi i apim han na mekim promis toktok long taim ol soldia i apim PNG fleg long Indipendens Hill, Waigini, Mosbi long Mande Septemba 16n.** Foto: Ivan Bayagau.

Gavman bilong Praim Minista Bill Skate i tokaut olsem em i laik skruim BTG i stap yet long go pas long ol toktok wantaim BRA na BIG inap olgeta samting i stret. Dispela em tingting bilong sampela mausman bilong Bogenvil, husat i bin autim long *Wantok* niuspepa long tupela wik i go pinis.

Oposisen Lida i rabisim ol dispela toktok na tingting. Na tok olsem nau yet tripela pipel i tokaut olsem ol i makim ol pipel long ailan. Em long Rijonal memba em ol pipel i votim, John Momis, Gerard Sinato, husat i tok olsem bikos em i het bilong BTG, em i bos bilong Bogenvil, na Francis Ona, bikbos bilong BRA. "Olsem na bikpela samting nau em mipela mas makim trupela lida bilong Bogenvil, husat i gat pawa em ol pipel long ailan i givim em long makim ol. John Momis i gat rait long ronim provins na mipela i no ivim em dispela rait," em i tok.

Narokobi i tok moa olsem ol trupela lida husat i makim maus bilong ol Bogenvil pipel long go pas long toktok em ol ilekted lida. "Olsem na mi sanap strong yet olsem mipela i no inap givim 12-pela moa mun long trensisenel gavman. Bikos dispela i no bihainim demokretik pasin," em i tok.

Memba bilong Saut Bogenvil long Nesenel Palamen, Michael Laimo, i skruim tok olsem ol pipel i votim 4-pela nesenel memba long makim ol. Olsem na ol i mas go pas long paitim dispela toktok, aninit long mausman, Momis olsem gavana. "Sapos nesenel gavman i ken holim nesenel ileksen na ol pipel i votim mipela 4-pela, olsem wanem na em i no inap long holim provinsal ileksen bai ol pipel i votim ol mausman na mausmeri long makim ol long provinsal gavman. Wanem samting i rong long dispela?" em i askim olsem.

Laimo i tok ol pipel i kam ausait pinis long bus nau, na ol yet i go pas long toktok bilong kamapim gutpela sindaun. "Dispela em hatwok bilong ol na mipela ol pipel ol i votim mas bihainim na go pas long toktok," em i pinisim tok olsem.

Nau yet em Palaman i skruim pinis taim bilong BTG long tupela taim olgeta insait long 4-pela yia.

**Memba bilong Saut Bogenvil, Michael Laimo, toktok wantaim ol loman nau long stapim Skate-Haiveta gavman long kisim sapot bilong Palamen long skruim taim bilong Bogenvil Trensisenel Gavman. Ritim stori long pes 2.**

**Gavman putim VAT takis long arere**

**PRAIM Minista Bill Skate i tok gavman i putim long arere dispela nupela Valyu Aded Takis o VAT, we em i bin tokaut bipo long kamapim long kantri long neks yia, aninit long 1998 Baset.**

Praim Minista i no tokaut olsem gavman bai rabisim o rausim olgeta dispela takis, nogat. Em i tok tasol olsem ol bai putim long arere, na larim i stap pastaim.

Em i tokaut olsem taim em i toktok long bung bilong ol gavana bilong wanem provins, em i bin kamap long Mosbi long las wik.

Skate i tok disisen bilong kamapim VAT takis long kantri em ol i no inap statim kwik. Em i tok ol bai glasim gut pastaim, na bihain bai tokaut sapos gavman bai kamapim dispela takis o nogat.

"Mi laik tokim yupela ol memba na Gavana olsem gavman bilong mi i no inap resis long statim kwik dispela VAT takis. Mipela olsem gavman i mekim disisen pinis long putim VAT long arere long sampela taim pastaim," em i tok.

Dispela toktok bilong praim minista i bihainim bekim bilong ol bisnis kampani, PNG Tred Yunien Kongres, husat i makim ol liklik yunien, na planti liklik wokman meri insait long kantri, na ol arapela grup insait long komyuniti, husat i egensim dispela takis.

Bikpela komplem em dispela takis bai givim bikpela mekimsave long ol liklik manmeri. Bikos gavman i slek yet long sekim gut ol bisnis kampani, husat bai yusim dispela takis. Na apim prais bilong ol samting.

Gavana bilong Morobe, Luther Wenge, i toktok strong tru long kibung egensim dispela nupela kain takis. "Mipela olgeta save olsem dispela takis i no bihainim lo bilong kantri, bikpela em aninit long provinsal gavman rifom. Bikos takis ya bai rausim pawa bilong ol provinsal gavman long makim sels takis," em i tok.

**Bipo gavman bin tokaut long statim dispela takis long Janueri 1, 1998.**

**WANTOK**

All departments. Phone: 325 2500 - Fax: 325 2579  
P.O. Box 1982, Boroko, NCD, Papua New Guinea.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Published Weekly, Thursday, for Word Publishing Company Pty. Ltd.

Acting General Manager and Group Editor in Chief: Anna Solomon.	Papers distributed by air throughout PNG.
Advertising Manager: Mike Kanin.	Available by airmail subscription within Papua New Guinea and overseas.
Editor of Wantok: Leo Wafiwa	

Advertising deadlines, Display Bookings and Camera ready copy: Tuesday midday. Classified Advertising: Wednesday 2pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official Display Advertising Booking Form.



# WANTOK

NIUSPEPA BILONG OL PAPA NIUGINI STRET

## Noken yusim hevi bilong san, na kisim nating mani

LAS wik Papua Niugini i amamasim 22 krismas bilong em, bihain long em i kisim independens long 1975. Long planti hap bilong kantri, ol pipel i no amamas got independens. Bikos kantri i bungim bikipela hevi nau. Bikos long hevi bilong san, we planti ples i drai.

Hevi i no kamap bikipela yet. Tasol i gat bilip olsem em bai kamap, sapos i nogat ren long neks mun na i go. Ol eria we i kisim bikipela bagarap em Westen provins, Westen Hailans, Isten Hailans na Bogenvil.

Nau yet Praim Minista Bill Skate i tokaut pinis olsem gavman bai givim K30 milien - K20 milien i kam long Orogen kampani, na narapela K10 milien i kam long 1997 Baset - antap long namba wan K4 milien long helpim ol trangu manmeri na pikinini long dispela birua.

Gavman bilong Ostrelia i tokaut long givim K526,000 long helpim mipela long dispela hevi. Ol bisnis kampani long kantri yet i bungim wantaim K500,000.

Bikipela askim nau em mipela yet i mas plenim gut ol samting, wantaim gutpela ripot long ol bagarap i kamap long wanem eria long wanwan provins. Na yusim mani gut long helpim ol pipel long dispela eria.

Em i tru olsem hevi bilong san i stap longpela taim i no nupela long planti nambis eria bilong PNG. Antap long hailans, em namba wan taim bilong ol nau long kisim kain bikipela hevi. Dispela i no min olsem ol nambis eria i stap orait. Nogat. Nau em mipela ken tok, san i stap longtaim taim tumas, winim mak bilong bipo.

Mipela rnas tingim olgeta dispela samting, na putim trupela stretpela askim i go long gavman long helpim. Mipela noken yusim dispela birua na giaman askim long mani. Long dispela kain pasin, ol pipel husat i kisim taim tru bai kisim taim moa. Na tu ol i ken indai.

Long kisim gutpela, stretpela na trupela ripot long ol bagarap long provins, Nesanel Disasta na Imejensi Sevis wantaim Draut Rilif Komiti, na wanwan provins i mas wok bung nau. Dispela bai helpim long wok bilong tilim mani na helpim samting.

I gat planti ripot nau bilong paia i kamap long ol hap olsem Kefamo long Isten Hailans, Wabag, Westen provins. Sampela bilong ol dispela paia i kamap bilong ol yet, bikos long hot bilong san. Tasol i go tu long ol pipel long noken mekim paia nau long ol bikbus bilong mipela. Bikos dispela i ken kamapim bikipela birua long laip bilong ol abus, na tu bilong mipela ol manmeri na pikinini.

# WANTOK

NIUSPEPA BILONG OL PNG STRET

P O Box 1982 BOROKO  
Telepon namba: 325 2500  
Feks namba: 325 2579

## PE BILONG WANPELA VIA 52 NIUSPEPA

PLES	AIR
Mosbi	K 40.00
Arapela PNG eria	K 75.00
Australia na Nu Silan	K115.00
Esia pasifik na Japan	K150.00
Amerika na Yurop	K215.00

## Gavman tilim K1 milien pinis long ol provins

OL i tilim pinis K1 milien i go long olgeta provins long kantri bilong helpim ol long daunim hevi bilong biksan na ais.

**VERONICA HATUTASI** i raitim  
Bos bilong Nesanel Disasta na Imejensi Sevis Leith Anderson i tokim

Wantok olsem olgeta hap bilong kantri i bungim hevi long biksan we i kamapim sot long kaikai, wara na sik olsem pekpek wara, het na bel pen samting.

Enga, Westen na Sauren Hailans i stap long top lista olsem tripela provins long kantri we i kisim taim nogut tru.

Mista Anderson i no tok hamas mani wan wan provins i kisim long helpim ol long dispela taim bilong hevi long kaikai na wara i sot. Em i tok tupela provins i no salim yet ripot i go long ol.

Em i tok tu olsem nesanel gavman i katim K4 milien long helpim ol provins long dispela taim bilong hevi na AUSAid i givim narapela K600,000 bilong wankain wok.

Ripot long Nesanel Weda opis we i save lukautim ol ripot long biksan, ren na win i tokaut olsem taim bilong biksan bai i stap yet inap long pinis bilong Disemab na Janueri. Taim bilong ren i save statlong Novemba long kantri tasol i luk olsem dispela bai i no kamap nau.

ipot i tok hevi we kantri i bungim long nogat ren na bikipela ais i pondaun long hailans rijon i bihainim El Nino we i wanpela kain weda kondisen i kamap long wol wanpela taim bihain long faivpela krismas. Nau em i kamap long Saut Amerika na Wes Pasifik rijon we PNG i kam aninit long en

Long skruim nius bilong biks-

dan na nogat ren, Bogenvil i wetim ansa long Nesanel Disasta na Imejensi Sevis (NDES) long K1.6 milien bilong helpim ol pipel long sampela hap bilong provins we bikipela san i kukim ol na ol i sot long kaikai na wara.

Long wankain taim tu sampela kea senta na ol ples lain long saut Bogenvil i bungim hevi long kaikai i sot bihainim bikipela ren long hap we long mun Julai bikipela ren i bagarapim ol gaden kaikai.

Edministretiv Seketeri Francis Kabano i tok opis bilong em i wetim yet ansa long NDES opis long askim bilong ol.

Em i tok tu olsem Dipatmen bilong Not Solomons i salim pinis ripot we hevi na bagarap bilong biksan na ren i kamapim insait long provins i go long NDES hetkota long Mosbi.

Mista Kabano i tok ol i kirapim pinis wanpela disasta komiti long provins bilong glasim ol hevi, paihim rot long helpim na tu kisim ol hevi i go long NDES.

Em i tok Buka distrik, ol eria long not Bogenvil, sampela hap bilong not is na not we Bogenvil na ol liklik ailan bilong Nissan, Motlok, Carterets, Nuguria na Tasman i bungim bikipela hevi moa long wanem ol i no kisim ren long longpela taim, inap long faivpela mun samting nau.

Mista Kabano i tok ol ples klostu long nambis em ol i kisim taim tru. Long Buka distrik, ol ples insait long bus i orait na ol dispela lain i wok long salim kaikai long maket tasol ol liklik ailan na ol nambis ples i bungim bikipela hevi tru.

Em i tok tupela wik i go pinis ren i bin pondaun long wanpela awa long Buka tasol i pinis gen.

Dispela em bihain long faivpela mun na ol gaden kaikai i bagarap na wara i sot. Emmi tok bikipela win i wok long rausim ren na hevi i go moa yet we i mekim ol atoriti na pipel i wari stret.

Em i tok long Buka, san i kukim ol gaden kaikai. Ol lip bilong ol i stap grin tasol ol kaikai bilong ol i sting. Dispela i kamap long kaukau na taro.

Long Nissan Ailan, kaikai i sot na ol pipel i wok long kaikai ol pikinini bilong diwai mangru. Wara i sot tu na foapela wik i go pinis ol i salim ol Gret 7 inap long Gret 9 sumatin long Nissan Hai skul i go long ples. Ol komyniti skul i op inap long wanbelo tasol. Wankain samting i kamap long ol skul insait long Buka distrik, not is na not wes.

Em i tok Bogenvil Tremsisenel Gavman i salim pinis kaikai helpim wantaim 900 beil rais i go long Motlok, Nuguria na Carterets bilong helpim ol pipel husat i kisim taim tru.

Em i tok ol DPI na distrik sevis opis i go aut pinis long kisim ripot we biksan na ren i kamapim long olgeta distrik long Bogenvil. Ol dispela ripot taim i pinis bai ol i salim i go long NDES hetkota bilong lukim, glasim na skelim long givim helpim.

Mista Kabano i tok hevi i wok long go nogut na ol eria we i kisim bikipela hevi long Not Bogenvil, not is, not wes na ol liklik ailan i laikim tru helpim wantaim kaikai na wara.

Em i tok helpim grup bilong Australia AUSAid i givim pinis sampela wara kontena na ol kanvas bilong helpim ol pipel bilong Bogenvil husat i bungim hevi long biksan.

## Oposisen bai go sekim ol hailans eria em san na ais i bagarapim

**WENCESLAUS MAGUN** i raitim

BIHAIN long planti tok-tok i kamap olsem planti hap bilong kantri i sot long kaikai na ol man i hangre, Oposisen lida, Bernard Narokobi wantaim namba tu bilong em Masket langalio na ol memba bilong Hailans long Oposisen bai go sekim ol ples long Hailens, olsem Magarima, lalibu, Basin long Sauten Hailens, na Kandep na Laiagam insait long Enga Provins we ol i bilip i bungim dispela bikipela bagarap. Dispela tim bai i go long Hailens long dispela wiken.

Ripot i kam long opis bilong Mista Narokobi i tok, ol lida bilong Oposisen i no laik sindaun tasol long opis long Mosbi na bilip long ol toktok i kam long ol Edministreta bilong ol provins. Nogat. Long tingting bilong Mista Narokobi, ol lida yet i mas go long wanem ol hap toksave i kam olsem ol pipel i kisim taim long dispela strongpela san o ais i pondaun.

Dispela tim bilong Oposisen bai kamap wantaim wanpela ripot bihain long lukluk raun bilong ol na givim dispela ripot long gavman long neks wik Tunde long palimen.

## ● Ostrelia givim K526,000 long PNG

KRAI bilong ol pipel bilong Papua Niugini long hevi bilong san na ais i no go nating. Ostrelia i harim pinis dispela kraia na i helpim PNG wantaim samting olsem K526,000.

Ol i givim tu ol save-man bilong ol bilong go long ol ples i kisim taim long dispela hevi na sekim ol samting. Ol bai glasim ol hevi long helt, agrikalsa na kamapim imejensi operesen senta bilong helpim ol lain i kisim taim long bihain taim.

Dispela helpim i kam long AusAID.

## Bikipela paia bagarapim ol ples long Nu Ailan

**NEVILLE CHOI** i raitim

BIKPELA paia na ples drai i bagarapim planti ol ples long is na wes kos bilong Nu Ailan.

Planti man long ol ples long is kos bilong bikiples Nu Ailan i kisim bikipela taim tru taim ples drai i kamap long hap.

Long tupela wik i go pinis, ol man meri long sampela ples i bungim bikipela hevi tru taim wara bilong dring i sot long ples bilong ol.

Long las wik tasol narapela bikipela hevi i bin bungim ol lain long is kos Niu Ailan taim bikipela paia tru i bin

kirap na bagarapim olgeta gaden na bus long dispela hap.

Nau yet dispela bikipela paia i wok long pait i stap. Long rot bihainim haiwe i ron long is kos, olgeta plantasin kokonas na kakao i pinis.

Nogat man i save long as stret bilong dispela paia na em i kamap olsem wanem.

Planti long ol manmeri long is kos i painim hat tru long painim wara bilong dring na kukim kaikai, na narapela hevi gen em bikipela paia i wok long bagarapim olgeta samting tu.

Dispela bikipela paia nau i holim ol bikbus i go

olsem long wes kos bilong ailan na ol lain long hap tu i wok long kisim taim.

Bikipela paia i bagarapim ples i stap tasol long sampela hap ol manmeri ino sindaun tasol na lukluk.

Long sampela ples long wes kos, ol man meri na komiti bilong ples i wok long wok bung wantaim long traun na pait wantaim dispela paia.

Planti ol man meri bilong ol dispela ples i wok long bung wantaim long ol liklik komiti husat ol i gat ol kainkain hap wok ol bai mekim long paitim dispela bikipela paia.

Sampela ol komiti ol i kolim wara komiti, na ol arapela, wok bilong ol em bilong lukaut long paia.

Dispela paia nau i wok long go insait moa long maunten na ol man i painim hat long bihainim bilong traun na kilim.

Provinsel edministreta bilong Niu Ailan, Lima Dataona i tokaut olsem dispela bikipela paia em nambawan wari tru bilong gavman.

Em i tok olsem i no dispela paia tasol i wok long bagarapim ol man meri long provins.

Narapela bikipela hevi em planti ol ples long Nu Ailan i wok long sot long wara nau.

**TORO**

TORO SPAK NA GO RAUN LONG ELA BIS LONG LUKIM OL AZZIMBAH BEN I PILAI...

BAGA HARIM MUSIK LONG-WE TRU NA EM GAT FILINS LONG DANIS STRET...

EM KALAP IGO ANTAP LONG STEJ NA KILIM LONG DANIS...

BAGA MEKIM KAIN DANIS BILONG OL MERI NA OL MAN I TING EM WANPELA GELI-GELI...

OL I BELHAT NA NA RAUSIM EM NA RONIM EM IGO DAUN LONG KOKI MAKET...



Bogenvil nius wantaim VERONICA HATUTASI

15 namba 3 level gavman kamap pinis

BOGENVIL i kirapim pinis 15 Kaunsil ov Eldas (COE) olsem Ted (o namba 3) Level Gavman insait long ol interim atoriti eria long provins.

Long Desemba las yia, gavman bilong olpela Praim Minista Sir Julius Chan i bin oraitim Bogenvil Trensisenel Gavman (BTG) long kirapim COE sistem bilong gavman insait long ol interim atoriti eria. Bikos gavman i luksave long ol sief, lida na bikman long ples olsem ol man i gat pawa insait long komyuniti bilong ol. Na ol inap wok bung wantaim ol pipel long ples, ol BRA, resiten paitman, sekyuriti fos na arapela Bogenvil ailan pipel long bringim gutpela sindaun bek long ailan.

Eksekutiv kaunsil bilong BTG i bin oraitim 23 COE long provins. I kam inap nau, 15 em ol i kirapim pinis. Na 8-pela tasol i stap yet.

Ol dispela we ol i kirapim pinis em long Nehan COE long Nissan Ailan, Tinputz COE long not is distrik, Teua COE long Kunua/Keriaka, Selau/Quigen, Mahari/Quigen COE, Suir COE olgeta long Notwes distrik, Not Nasioi COE, Torau Lala COE, Rau COE, Terra COE na Wakunai COE insait long Sentrel Bogenvil.

Faipela COE i kirap pinis long Saut Bogenvil. Em long Banoni, Nagovis, Rino Mumangrure, Siwai Pongo na Luile COE.

Asisten seketeri bilong Lokol Level Gavman na Komyuniti Sevis, Andrew Pisi, i tok ol dispela 15 COE bai statim wok long dispela mun bhain long ol senis ya i kamap lo.

Ol sief askim ol nesenel politisen long wok bung

VERONICA HATUTASI i raitim

SALENS i go long ol sief na bikman bilong Sentrel Bogenvil long kamapim belisi pasin namel long ol yet. Na karimaut wok bilong kamapim gutpela sindaun insait long wanwan distrik bilong ol.

Provinsal pis kodineta, Chris, Siriosi, i bin mekim dispela singaut insait long wanpela kibung bilong kamapim gutpela sindaun, em i bin kamap long Arawa long las wik.

Ol sief, sekyuriti fos memba o ol soldia na plisman, Bogenvil Trensisenel gavman memba, na ol lain bilong distrik edministresen i bin stap long dispela bung.

Mista Siriosi i tokim bung olsem ol lida i mas wok wantaim gutpela tingting na nogat bel kros. Ol wok ol i mekim i

mas kamap long ples klia na ol noken haitim wanpela samting. Noken wokim pasin long tok samting long wanpela grup na tanim narakain gen long narapela grup. Em i tokim ol sief long was gut taim ol i wokim wok bilong ol long wanem wanpela liklik asua i save kamapim bikpela hevi.

Mista Siriosi i tok ol wok long painim gutpela sindaun long provins i go gut long dispela taim na BRA/BIG i wok long go pas long planti pis program.

Long wankain taim tu, ol sief long Sentrel Bogenvil i wanbel long kamapim belisi na sekan pasin namel long ol yet na ol sekyuriti fos lain. Ol laik mekim wankain tu wantaim ol BRA/BIG bipo long ol i karimaut ol wok long pis program ausait long ol pis zon eria.

Ol sief i putim salens i go tu

long ol Bogenvil nesenel Palamen lida long wok bung, stretim pastaim hevi ol i gat namel long ol, na putim het na wok wantaim long stretim bek Bogenvil na pipel bilong ol. Ol i tok taim ol lida i sanap wantaim gutpela bel na wok bung, ol pipel long ples bai i amamas na wokim wankain wok long distrik, komyuniti na ples levul.

Long wankain taim tu, bos bilong PNG Difens Fos Brigadia Jenerel, Kenel Leo Nuia, i tokim ol sief olsem ol i gat bikpela wok tru long ol wok bilong painim gutpela sindaun long Bogenvil.

Em i tokim ol olsem nau em i no taim bilong sutim tok long wanpela arapela tasol em i taim bilong putim het wantaim na go hetim ol gutpela wok long stretim ples na ol pipel bilong ol.

"Yupela ol sief i mas go pas

long wok bilong painim gutpela sindaun. Yupela i mas wok wantaim na go hetim ol toktok na wok bilong painim gutpela sindaun", Kenel Nuia i tokim ol.

Kenel Nuia i tokim ol sief olsem taim bilong sutim tok long wanpela arapela, i nogat bikpela tingting long wok bilong ol i ova na nau em i taim long go fowed long wok bung wantaim na strongim ol wok long painim gutpela sindaun.

Em i tok sapos ol i no wok hat, gutpela sindaun bai i no inap kamap. Na sapos ol ino wok gut, ol arapela distrik long Bogenvil bai i winim Arawa na em i stap bhain yet.

Kenel Nuia i mekim klia olsem ol sekyuriti fos husat i stap wok long Bogenvil long dispela taim i bilong helpim long ol wok bilong kamapim gutpela sindaun.

Bus paia


I kam long pes 1

Ripot i tok sampela man bilong Kurelka-Narapela i bin waswas i stap long Kaugel Riva klostu long wanpela oipela gaden. Papa bilong dispela gaden i bilong Melpa-Alka. Ol waswas pinis na mekim paia arere long wara long drain skin bilong ol. Tasol paia ketsim drai bus na paia kwik i go karamapim 4-pela hekta bilong gaden na bus raun.

Long Anglimp-Saut Wagi na Jimi na Mirs eria bilong Westen Hailans, ol pipel i wari tru nau long propeti na gaden kaikai na kopi bilong ol. em bus paia i bagarapim pinis.

Long Tambul, ripot i tok paia long Maunten Giluwe i stap long tripela wik nau. Na kilim indai planti ol abus long eria olsem kapul, snek, dog, pig, paia.

Ol man long ples wantaim sampela gavman opisa i no save long wanem kain as na paia i kamap.



• Ol komyuniti lida, sekyuriti fos memba, na mausman bilong BRA i bung long ples Natsiogu long Buin, saut Bogenvil. Ol i wok bung wantaim nau long painim gutpela sindaun long ailan, na dispela i gutpela.


RAUSIM SIK POLIO, MISEL NA TETANAS

1997 NENESEL IMUNAISESEN DE



RAUN 1: Septemba 22 i go onal long Fraide 26.

RAUN 2: Oktoba long Monde 27 i go inap long Fraide 31.



As bilong ol hevi em Waigani bosim pawa

BOGENVIL rijonal memba, John Momis, i askim strong ol nesenel na provinsal lida long tingting long ol pipel, na mekim ol senis long gavman we bai givim moa pawa long ol. Na tu bai givim pawa na sans long ol pipel long mekim disisen long ol samting i karamapim laip na sindaun bilong ol. Na maski long Waigani i bosim ol.

Mista Momis i bin mekim dispela toktok indipendens toktok bilong em i go long publik long makim 22 kris-mas bilong Papua Niugini.

Em i tok pasin we pawa i stap long ol bikman, na pasin ol i mekim long yusim pawa bilong ol long paul pasin na westim nabaut bikpela publik mani i bagarapim tru kantri. Olsem na ol pipel i kisim taim nau.

Em i tok ol hevi we i kamap nau long PNG long mani i sot, ol pipel i no kisim gutpela sevis, nogat inap sut marasin wantaim haus sik na ol helt senta, planti manmeri i no save

yet long rit na rait, i sut long ol lida husat i no yusim gut mani, na pawa bilong ol long sevim ol pipel.

Bihainim dispela, Mista Momis i askim ol wanlain bilong em long glasin na skelim gen wok bilong ol olsem ol i makim ol pipel long Haus Palamen. Na tu long yhusim gut publik mani, bihainim ol gutpela pasin na laikim tasol ol samting we ol inap long baim.

Mista Momis i givim tok piksa long Wagi Veli insait long Westen Hailens we hevi bilong ais na bikpela san i bagarapim stret. Na ol i sot long wara na kaikai.

Em i tok long planti yia bipo taim ol waitman i no kamap long kantri, ol pipel i daunim ol kain hevi long save na rot bilong ol yet. Tasol bihain PNG i kisim indipendens long 1975, ol samting i kamap narakain nau. Bikos olgeta pawa, mani ol arapela samting moa em gavman tasol i bosim long Waigani.



# Gavman tok nogat long Sir Dennis na Flight West

....papa bilong Talair bipo i mas sem ya

GAVMAN i tok "nogat" long papa bilong balus kampani bipo Talair, Sir Dennis Buchanan long kirapim gen narapela balus bisnis bilong em long PNG.

**JAMES KILA** i raitim  
Minista bilong Trensport na Sivil Aviesin, Philemon Embel i tokaut long dispela disisen

bilong gavman bihain long Sir Dennis i bin traim long kisim tokorait long gavman long bringim nupela kampani bilong em Flight West Airline i kam insait long kantri.

Sir Dennis i bin pasim balus bisnis bilong em (Talair) long 1993 na bin lusim planti manmeri i nogat wok. Em i bin mekim wankain pasin tu long 1990 taim em i pasim niuspepa kampani Niugini Nius na planti manmeri i nogat wok.

Talair i bin wanpela bikpela ted-level balus kampani insait long saten hap bilong wol long dispela taim.

Mista Embel i tok kampani bilong Sir Dennis Buchanan, Flight West Airlines bai i no inap mekim wok bilong en long Papua Niugini. Dispela em bikos papa bilong kampani Sir Dennis i bin mekim rabis pasin tru long 1993 taim em i pasim daun operesin bilong balus kampani bilong em long bipo, Talair, na i bin mekim planti ol manmeri i nogat wok.

Mista Embel i tok posisen bilong gavman long Flight West Airline



• Dennis Buchanan menesin dairekta bilong Flight West.

em "Nogat" Ol i no laikim Sir Dennis long kirapim bisnis bilong em long PNG.

Long las wik Sarere Flight West Airline i bin traim ron bilong wanpela balus bilong em long Mosbi i

go long Lae. Sampela ol bikman na ol ripota i bin ron t'ong dispela balus.

Insait long wanpela bung wantaim ol ripota, Sir Dennis i tok em i laik kirapim bek bisnis bilong em

long PNG long traim na resis wantaim Air Niugini.

Mista Embel i tok olsem gavman i no laik long givim laisens long Flight West long kirapim operesin bilong en long PNG. Dispela em

bikos dispela em kampani bilong Sir Dennis Buchanan, husat i papa bilong Talair bipo.

Minista i tok long Me 25, 1995 long 12-kilok long nait Sir Dennis i no bin toksave long gavman na ol pipel bilong dispela kantri taim em i pasim daun balus operesin bilong em long kantri.

"Em i no bin toksave long gavman pastaim na ol pipel bilong PNG, husat i gutpela kastoma bilong em olsem em i laik go," Mista Embel i tok.

Minister i bin kros long dispela toktok Sir Dennis i bin mekim bipo olsem PNG i nogat moni long ekonomi bilong em long stap na mekim bisnis.

Mista Embel i tok dispela Sir Dennis i nogat bilip tru long bihaintaim bilong PNG na tu bilip long ekonomi bilong yumi. Em i giaman tasol long go na kirapim Flight West long moni em i kisim long hia.

Mista Embel i tok nesene gavman bai orait tasol sapos gavman bilong Australia i givim nem bilong narapela balus kampani long wok long PNG tasol i no Flight West.

Em i tok olsem em i bilip dispela disisen bilong gavman em i orait na i no go egens long dispela gutpela MOU agrimen ol i sainim long wok bung wantaim Australia ino long taim i go pinis.

Mista Embel i tok gavman i soim rait bilong en long noken larim ol samting i kam insait long kantri.

## Oro provins i sot long marasin na ol samting bilong helt sevis

HELT Edvaisa bilong Oro provins, Samson Papapu i singautim provinsel gavman long sapotim olgeta wok bilong ol helt woka insait long ol rifom aninit long nesene helt plen.

**HELEN REI** i raitim  
Mista Papapu i mekim dispela singaut long taim em i opim Gona haus sik las Fraide. Dispela em i hap wok bilong ol lain sevis man bilong Rotary long tingim ol lain husat i bin pait long woa tu na Oro provins. Ol i kolim dispela wok olsem 'League Living Memorial Project'.

Long de bilong opim dispela projek, 11-pela sevis man husat i bin pait long wol woa tu i bin kam long Gona witesim dispela bung na givim hona i go long ol wanlain bilong ol husat i dai long woa.

Mista Papapu i tok tu olsem sapos gavman i no givim sapot long dispela projek, ol wok ol man i statim inap bagarap maski bun bilong ol i lus nating long wok. "Helt bilong ol pipel long Oro provins i no kamap gut. Bikpela tru em ol mama na pikinini husat i dai long ol sik yumi inap long stapim. Tasol yumi nogat ol masin na marasin," em i tok.

Em i go het na tenkim Paul Hape siaman bilong Gona projek, long ol mani ol i givim bilong stretim bek Gona Helt Senta. Na em i tenkim tu ol lain husat i bin bungim dispela mani. Mista Papapu i tok kain ol lain olsem i save mekim wok bilong helt i go het. Mista Papapu i tokim ol olsem ol lain i go pas long Gona projek i yusim gut mani bilong ol na mekim olgeta wok long en.

Ol sevis man bilong woa i lukluk na glasim hevi bilong ol mama na pikinini long ples long Gona. Ol i tok, i tru ol i lukim olsem divisen bilong helt i sot tru long ol masin na marasin bilong wok.

## Strongpela kus na pekpek wara bagarapim ol pipel long Not Flai

NOT FLAI plis komanda, Sief Inspekta Saibu Ako i tok ol i no save yet long wanem as na 5-pela pipel i bin indai long Westen provins

**IAN KAKARERE** i raitim  
Ripot i tok tupela pikinini na tripela bikman i bin dai long Lek Murray eria. Ako i tok ol i no save yet long wanem as na ol dispela pipel i dai.

Nau yet ol bikbos bilong haus sik i no save yet long as bilong indai. Tasol planti pipel long eria i wari long planti manmeri na pikinini i kisim pekpek wara na strongpela kus long Lek Murray eria.

Nau yet ol helt senta na klinik wantaim ol bikman meri bilong helt long eria i lukluk long dispela samting. Na laikim olsem dispela hevi i noken go bikpela.

Ol pipel i kisim kus bikos long smok na das bilong paia, em ol pipel i mekim bikos long drai gras na diwai em hotpela san i kamapim. Na tu ol pipel i kisim mekimsave long pekpek wara. Bikos ol i nogat gutpela wara bilong dring.

Flai Riva Development Tras em Ok Tedi Maining Limited kampani i kamapim long saplaim tenk wara na wara pam long ol pipel i sot long wara. Ripot i tok wara long oldispela tenk wara na pam wara i pinis.

Ol ripot i tok sampela pipel long ol ples arere long Flai na Ok Tedi wara i kisim stret wara nau long dispela tupela bikpela

wara, maski ol i bilip strong olsem wara i bagarap pinis bikos long ol pipel nogut bilong Ok Tedi main.

Long planti arapela ples long Lek Murray na Not Flai eria, ol pipel i digim bikpela hul long graun long kisim wara. Na tu long planti ples, ol gaden kaikai i bagarap pinis, bikos long hot bilong san. Mekim na planti pipel i strong nau long kaikai saksak.

Saksak em i wanpela bikpela kaikai bilong planti pipel long Westen provins. Na tu i save sevim laip bilong ol, taim ol i sot long gaden kaikai long taim san i stap longpela taim olsem nau.

Ol arapela ripot i tok planti pipel long Lek Murray eria i lusim pinis ples bilong ol. Na go stap nau long ol tais saksak eria long Strikten eria long painim wara. Bikos dispela em ol hap tasol we i gat sampela wara bilong ol long dring, waswas na kukim kaikai.

Olpela primia bilong Westen provins, Semai Aitowai, i tok hevi bilong san i stap longpela taim na mekim wara i drai, na tu i nogat inap kaikai, na ol pipel i lusim strong bilong ol. Em i tok olsem long olgeta apinun, ol pipel save pilim tait hariap, na tu kisim hetpen. Olpela primia i bilong Lek Murray eria.

Mista Aitowai i tok tu olsem ol pikinini i kisim taim long pekpek wara na strongpela kus. Na tu ol bikman meri i no strong nau long paitim na wasim saksak bilong kaikai.

## Lukaut long wokim paia nating long bus

OL MANMERI i mas was gut taim ol i wokim paia long bus, bikpela san na olgeta ples i drai na paia i ken go bikpela tru na bagarapim ples.

Nau yet long planti eria long PNG san i mekim planti ples i drai na ol bus na gras i ken painim paia isi tru.

Nau yet planti ples long Not Kos na Raikos long hap bilong Madang provins i bungim bikpela drai tru. Planti ol han wara bare long drai olgeta na nogat wara i ron.

Dispela bikpela drai sisen i kamap long

planti hap bilong kantri tru. Long hap bilong Morobe bikpela ren i pundaun long Lae siti tasol. Ol hap bilong Markham na ol narapela distrik insait long provins i nogat ren na ples i drai.

Insait long Morobe yet bikpela ol kunai paia long hap bilong Markham na Nadzab i mekim bikpela smok na ol lain long DCA i tok olsem planti ol balus i painim hat liklik long go pundaun long Nadzab.

Ripot long hap bilong Momase rijon i tok tu olsem planti ol manmeri long ples i painim

hat tru long painim kaikai. Ol gaden i drai na ol kaikai i no gro. Dispela i mekim ol pipel i kisim kaikai long stoa long sapotim ol yet.

Planti ol pipel long ol eria insait long hailans i painim hevi nau yet bikos long bikpela san na nogat ren. Long sampela hap strongpela win na kos i bagarapim ples na ol diwai samting long gaden i bagarap. Ol provins long hailans we i bungim dispela hevi em Enga, Sauten Hailans, Westen Hailans and sampela eria long Isten Hailans.

## ADLEF laik helpim ol Sepik pipel long maunten

WANPELA nupela environmental grup i stat pinis long hap bilong apa-Sepik eria long helpim ol papagraun long stretim gut ol wok bilong timba na ol wok got na tu long bringim gutpela developmen.

Nem bilong dispela grup em Ambunti Distrik Lokal Envairomen Faundesin (ADLEF) na ol man husat i go pas long en ol ol lokal pipel husat i laik long helpim ol manmeri long ples stret.

Dispela grup i bin stap bihain long ol i lukim olsem bikpela bagarap i save kamap long ol bus, wara na graun taim bikpela ol developmen long sait bilong katim diwai na painim gol i save kamap. Ol i tok PNG em i wanpela laki kantri tru wantaim planti ol wail enimol na ol diwai long bus insait long Hunstein eria na ol narapela maunten bilong Sepik. Tasol i gat bikpela poret na hevi tu i stap long sait bilong bikpela ol timba kampani i kam na katim diwai. Olsem na dispela grup ADLEF i strong long

bringim gutpela edukesin aweanes i go long ol viles pipel long givim gutpela tingting long lukautim gut envairomen bilong ol. Na ol samting ol i lukautim i ken stap na ol lain tumbuna long bihain taim i ken yusim.

ADLEF i lukim olsem long ol planti ya i go pinis ol papagraun i bin lusim planti ol samting bilong ol na tu ol pasin tumbuna ol kastom bilong lukautim bus, wara na graun bilong ol.

Grup ya i lukim olsem sapos ol pipel i was gut long graun bilong ol pasin tumbuna bai i stap strong na tu ol diwa na abus bilong bus bai stap gut.

Nau yet ol papagraun i no laikim bikpela ol timba kampani i go na katim diwai long eria bilong ol.

Ol i laikik ol liklik ol developmen we i ken helpim gut sindaun bilong ol pipel long dispela eria na tu developmen we i no bringim bikpela bagarap long bus, wara na graun bilong ol.



# TU MINIT TINGTING

## PASIN BILONG AUTIM TENKYU

WANPELA mama i slip long bet na i wok long dai. Man bilong em i bin dai pinis long taim bipo na i gat tripela pikinini i stap. Bilong sapotim ol, mama ya i painim wok long wanpeal faktori. Long san em i wok long faktori na bihain em i kam bek long haus na i kukim kaikai na wasim klos na klinim haus. Mekim mekim olsem inap long planti ya, na ol yangpela i groap pinis.... nau mama i bagarap olgeta long wok na i slip i stap long haus sik.

Nau 4-pela pikinini bilong em, tupela man na tupela meri, i sanap raun long bet bilong mama na fesbon i tokim mama olsem, "Mama, oltaim yu bin mekim gut tasol long mipela. Mipela i praut long yu na mipela i laik bai yu mas save olsem, mipela i laikim yu tru, na mipela i laik tenkim yu."

Tarangu mama i opim ai liklik na i lukim fesbon ya na i tokim em olsem: "Bilong wanem na yu bin wet inap long nau bilong tok tenkyu long mi? Em i let tumas." Na em i pasim ai na i dai.

Planti bilong yumi i save mekim wankain tasol. Yumi save wet inap wanpela man o meri i dai pinis, nau tasol yumi autim ol naispela toktok long em. Yumi olsem ol ston bilong matmat-ol i save mekim gutpela toktok tasol long ol

daiman. Tasol, sore, ol daiman i no save ritim ol dispela toktok.

Mobeta yumi autim tenkyu bilong yumi long taim ol manmeri i stap laip yet na ol inap amamas long harim. Long olgeta de yumi save hangamap long planti pipel nabaut long yumi. Tasol wantaim ol i save harim tenkyu long maus bilong yumi?

I no longpela taim i go pinis na wanpela kepen bilong ol plis i bin tok olsem long redio Kalang, "Mipela plisman i save wok long san na long nait. Sampela mipela i bin lusim laip long han bilong ol man nogut. Sampela raskol i bin sutim mipela long taim mipela i wok long helpim ol tarangu. Tasol wantaim mipela i save kisim wanpela tok tenkyu long ol pipel?"


Na dispela tok i tru tumas. Long olgeta wan wan de yumi olgeta i hangamap long ol plisman na dokta na nes na tisa na pablik seven na mekenik na papamama. Sapos ol i holim gut wok, yumi no gat tok. Sapos ol i slek long wok, wantu yumi komplek. Tasol

wanem taim yumi save tok tenkyu long ol? Ating....

Sapos yumi stap long taun, laip bilong yumi hangamap long planti arapela pipel moa. Ol waia bilong Elcom i bringim pawa long haus. Ol mumutman i rausim ol rabis. Ol man i brumim strit. Ol man i kukim bret long nait bai yumi ken kaikai nupela bret long moningtaim tru. Ol planti klak i stap long ol stua bilong helpim yumi. Ol bas na PMV draiva i karim yumi nabaut. Sapos ol i stap wok, bai yumi olgeta i anka i stap.

Na sapos yumi stap bek long ples, yumi no save tingting planti long planti wok gavman i save mekim bilong helpim yumi. Gavman i wokim skul na i baim ol tisa, i wokim ol klinik na baim ol nes. Gavman i wokim ol rot na i salim ol plisman bilong lukaotim yumi. Yumi save tok olsem: "Gavman i mas mekim olsem." Giaman!

Long taim yumi no gat gavman, long taim bilong ol tumbuna, husat i bin mekim ol dispela samting? Long planti arapela kantri ol pipel



FRANK MIHALIC i raitim

yet i mas baim na mekim ol dispea samting. We stap wanpela narapela kantri long graun we gavman i save baim ol sumatin long go long skul? Ating long PNG tasol. Na sapos wanpela studen long yunivesititi i no kisim poket mani, bai em i stop wok, em i straik. Wanem taim wanpela yunivesititi studen i bin tok tenkyu o soim tenkyu long gavman?

Olgeta taim yu lukim wanpela balus bilong Air Niugini flai antap long het bilong yu, pailot bilong dispela balus i hangamap long

samting olsem 50 pipel long graun bai dispela ran bilong Air Niugini go gut. Yumi tu i wankain. Long ogleta de na nait yumi hangamap long wok bilong planti manmeri nabaut long yumi bai yumi inap sindaun gut na sindaun isi. Long wanem, taim yumi save tingim long ol dispela wok? Na sapos yumi tingim, watpo yumi sarap long dispela samting? Pasin sarap i no save helpim wanpela man o meri. Mobeta yumi autim tingting na tok strong na stret olsem: "Gutwan!" o Kas bilong yu!" o "Tenkyu, poro!"

Na yumi no ken lus tingting long tenkyu long God tu, long wanem, olgeta samting nabaut long yumi i bin kam long han bilong em tasol. San i save kamap long olgeta moning taim, na ren isave pundaun, na ol klaut i wokabout isi long antap, na ol kaikai i save kamap. Yu ting ol dispela i otametik tasol? Sore, yu rong.

God i laik yumi mas tenkyu long em. Yu ritim stori bilong 10-pela lepraman long Luk 17: 11-19 na bai yu lukim olsem wanem na Jisas tu i laik harim dispela tok "Tenkyu."

Yumi save helpim kwiktai wanpela man o meri husat i bin tenkyu long yumi. Ating God i save bekim wankain tasol.

## Ol meri bilong PNG na Solomon bai holim UCWF kibung long Liggar

### WENCESLAUS MAGUN i raitim

Moa long 200 meri bilong Yunaited Sios long Papua Niugini na Solomon Ailans bai holim wanpela kibung long Yunaited Sios het kwata bilong Niu Ailan, long Liggar misin stesin long Septemba 20 i go

pinis long 27. Ol i kolim dispela kibung, Yunaited Sios Kaunsel ov Federesen (UCWF). Dispela kibung i bihainim namba wan UCWF i bin kamap long 1994 na planti ol meri long pasifik ailan i bin kam kibung.

As tingting bilong dispela kibung em: Jisas Kraus em i strong na hop long laip bilong yumi. Insait long dispela kibung planti ol man na meri bai givim ol

toktok i sut i go long wok bilong ol meri insait long Sios. Wanpela bilong ol dispela meri em Presiden bilong National Council Of Women, Susane Setae.

Long welkamim ol meri, ol pipel bilong Kalil ples bai putim pilai bilong namba wan misinari, Rev. George Brown taim em i kam sua namba wan taim long Kalil ailan na bringim Gutnius i kam long Disemba 1875.



• Asbisop Benedict Tovarpin i givim sakramen bilong Konpirmasio long ol pikinini long Utu, Madang. Foto: Fr Greg Tianni.

## Bisop Henry opim nupela haus lotu long Mugzing

Namba bilong ol katolik long Morobe provins i wok long gro i go bikipela. Longpela taim tru wok bilong Katolik sios long Morobe i save stap klostu tasol long Lae siti. Tasol Bisop bilong Lae daiosis, Henry Van Lieshout i tok nau em i namba wan taim tru bilong go long we tru na opim wanpela nupela stesin long Mugzing.

"Mugzing em i stap olsem 125 kilomita long narapela haus lotu. Dispela em i long we tru long wanpela peris. Olsem na mipela i wokim haus lotu bilong ol yet na salim pater Edward Suakau bilong go lukautim dispela peris wantaim ol pipel bilong em." Bisop Henry i tok.

Em i tok bipo ol katolik bilong Mugzing i save go long Lae, Erap na Ramu Suga long Misa na kisim ol sakramen. Tasol nau ol i no mas mekim dispela. Luteran Sios i go pas long Mugzing na bikipela lain tru long hap em ol bilipman meri na pikinini bilong Luteran Sios. Bikos long bisnis bilong bulmakau na gavman stesin, ol ausait lain i go long Mugzing bilong wok. Sampela bilong ol dispela wokman em ol katolik. Inap sampela yia i go pinis, sampela moa katolik i marit long ol asples na ol famili bilong ol i kamap katolik. Dispela i mekim namba bilong ol katolik i go bikipela na Bisop Henry i lukim olsem ol Katolik long Mugzing i mas gat peris pris bilong ol yet.

Wanpela samting i kirapim bel bilong Bisop Henry long salim pater i go long Mugzing em i bikos, ol

Katolik bilong Mugzing yet i wok hat tru long bungim mani bilong wokim dispela nupela haus lotu.

"Ol Katolik bilong Mugzing i bungim bikipela mani tru bilong wokim dispela nupela haus lotu. Memba bilong Markam, Andrew Baing tu i givim samting olsem K25,000 na Mugzing Distrik i givim samting olsem K3,000. Kos bilong dispela haus lotu em K150,000," Bisop Henry i tok.

Dispela haus lotu i gat rum bilong pater i slip, kuk kaikai na was was. Insait long haus lotu, i gat sampela naispela ol piksa, wanpela mangi Wes Niu Briten, Alois Posai i penim. Alois i pinisim skul bilong pen long Nesenel Ats long Yunivesiti bilong Papua Niugini.

Moa yet, Bisop Henry i tok Lae daiosis i go het na wokim wanpela nupela klasrum long Tent siti. Ol i statim dispela komyuniti skul long 1996 wantaim gred wan i go long gred tri. Dispela yia ol i wokim narapela klasrum bikos namba bilong ol sumatin i go antap long samting olsem 200 skul pikinini. Nau yet i gat samting olsem eitpela klasrum na tripela tisa. Bisop Henry i tok em i lukluk long kisim moa tisa long 1998.

Tent siti em wanpela nupela setelmen gavman bilong Morobe i mekim taim em i rausim ol lain setelmen long Bumbu wara na kisim ol i go sindaunim ol long en. Ol i kolim dispela ples Tent siti bikos pastaim ol pipel i kam stap aninit long ol sel haus o long Tok Inglis ol i kolim Tent.

## PNG krai long Mama Teresa

Moa long 200 pipela i bung long St. Mary's Katidrel long Mosbi long Misa bilong tingim dai bilong Mama Teresa long Sarere moning.

Ol i planim Mama Teresa long Sarere long prea haus bilong ol Sista bilong marimari long Calcutta, India. Misa long Mosbi em wanpela bilong ol planti kain misa ol katolik i mekim long planti kantri long wol.

Long daun pasin bilong em bilong helpim ol manmeri na pikinini na i no askim long pe, em i kisim bikipela namba long ai bilong ol gavman. Em i statim kongrigesen bilong em samting olsem 50 yia i go pinis tasol nau em i gat moa long 4000 sista husat i wok long samting olsem 120 kantri long wol. Mama Teresa i bin raun i kam long PNG long 1972 na bihain long 1984. Em i gat ol lain sista bilong em i wok long Hanuabada, Tokarara, Kerema, Veifa, Wewak, Madang, Vanimo na Mendi.

## Ol Buang pipel i hangre long Gagek Mewis Gutnius baibel

Olsem pikinini i krai long susu bilong mama, ol pipel bilong Buang insait long Morobe provins tu i krai long tok bilong God. I no long taim i go pinis ol saveman bilong tanim tokples husat i stap long Summer Institute of Linguistic (SIL) long Goroka, Dokta Bruce Hodley na Moses Johnson i tanim baibel i go long tokples bilong ol. Ol i kolim dispela baibel, Gagek Mewis long tokples Mapos. Dispela baibel i gat samting olsem 246 pes olgeta.

Ol Buang pipel i kisim pinis sampela kopi bilong Gagek Mewis. Tasol planti pipel i laikim yet dispela baibel na olsem ol yet i wok hat long painim sampela mani bilong baim moa Gagek Mewis. Insait long dispela hat wok bilong ol, Minista bilong Yut, Meri na Ol Lotu, Muki Taranupi i luksave long wari bilong ol Buang pipel na i givim ol samting olsem K5,500 long las Sande long Mosbi. Ol bai yusim K5000 bilong baim moa Gagek Mewis ol singsing buk na stori bilong god i mekim heven na graun na man.

Nau yet ol dispela buk i stap long wanpela printa long Hong Kong. Narapela K5000 Mista Taranupi i tok ol i ken yusim bilong ronim ol skul bilong wok lida insait long Buang distrik.

Mista Taranupi i tenkim ol pipel bilong Buang long digim poket bilong ol na bungim mani bilong baim Gagek Mewis. Em i tok em bai givim olgeta sapot long kain ol wok olsem bikos em i bilip olsem baibel i stap olsem galas bilong lukim pes we ol man i ken lukim na bihainim bilong stretim pasin na laip bilong ol long graun.

Wanpela bikman long ples Nalau Nathan i tenkim Mista Taranupi long gutpela pasin em i mekim. Moa yet em i olsem ol i laikim mao Gagek Mewis bikos planti lain long ples i hangre long ritim tok bilong God.

Tokples Mapos i karamapim 10-pela ples insait long Buang distrik na i gat samting olsem 7,000 pipel olgeta.



## Erima Sen Peters skul gat tupela nupela dabol klasrum

VERONICA HATUTASI  
i raitim

HATWOK na gutpela wok bung wantaim bilong ol papamama, tisa, skul bot na ol skul pikinini bilong Sen Peter Chanel praimeri skul long Erima, Mosbi i karim kaikai las wik. Skul i opim 4-pela nupela klasrum.

Bikpela amamas tru i bin kamap long las wik Fonde, taim olgeta grup i bung long amamasim hatwok we ol i putim long tupela yia bilong sanapim tupela dabol klasrum bilong nupela top ap skul.

Erima Sen Peters Praimeri skul i kamap namba wan skul insait long Mosbi long karim aut na pinisim klasrum prosek wantaim nogat helpim wantaim mani long gavman o ausait grup.

Hatwok na fan resing tasol bilong ol skul pikinini, papamama, skul bot na ol tisa i bin kamapim K175,000 bilong sanapim dabol klasrum.

Varakou konstraksen kampani i bin statim wok long sanapim klasrum las yia. Na skul i baim K175,000 olgeta i go long dispela kampani.

Foapela klasrum olgeta we i gat long en tupela gret 7 na 8 i yusim 4-pela klasrum nau.

Long las wik taim ol i opim ol klasrum ya, wanpela bikman bilong Varakou konstraksen kampani i givim ki bilong ol klasrum long prinsipel o het tisa bilong skul, Mary Bit. Nupela klasrum i gat tupela rum bilong yusim olsem opis bilong ol tisa.

Misis Bit i tok skul i bin kisim dispela salens long mekim klasrum bilong em yet. Bikos em i laikim ol pikinini i sindaun gut na skul. Sen Peters em i wanpela sios edukesen ejensi we Katolik Sios i papa long en.

Em i tok long kamapim dispela K175,000 moni, ol papamama i peim K100 projek fi long las yia na dispela yia tu long wanwan pikinini. N tu ol i

mekim ol arapela samting long bungim moa mani.

Wanpela em fan resing komiti i bin holim ol danis long kamapim mani. Ol sumatin tu i bin wokhat long bungim mani. Blkos wanwan klas i bin resim K1,000 long dispela prosek na kamapim K15,000 olgeta. Ol i wokim tu spelaton na kamapim K3,000 long en. Peris i bin givim K1,000 i go long ol.

Misis Bit i tok taim skul i kam aninit long nupela rifom las yia, ol papamama, tisa na ol sumatin i no klia olsem gavman bai helpim long wokim ol nupela klasrum o nogat. Olgeta i paul long dispela nupela senis.

Antap long dispela, skul i bin gat hevi. Bikos ol i nogat inap klasrum, graun bilong sanapim ol nupela klasrum, na mani bilong mekim dispela wok. Tasol hatwok yet bilong ol papamama, ol pikinini, ol bot mamba na tisa i mekim na klasrum i sanap nau bilong ol sumatin i ken sindaun gut na kisim save.



• Ol gret 6 sumatin bilong St Peter komyuniti skul putim kamap wanpela danis long amamasim nupela dabol klasrum bilong ol.

Yunaited Nesens i putim wantaim ripot long wok bilong mekim planti pikinini i save long rit na rait. Dispela ripot i kam aut long dispela yia, na i toktok long wanem ol samting bilong mekim, na ol hevi em wanwan yangpela kantri olsem PNG ken bungim long strongim literesi wok insait long wol. Dispela stori i autim stori hevi long PNG we i kamapim nau sampela senis long wok bilong ol. Raitim stori long pes 15.

## 2 milien PNG pipel no save long rit na rait

STRONGPELA singaut i go long mekim PNG i kamap wanpela kantri we ol pipel i kor rit na rait.

Asisten seketeri bilong Edukesen, Godfrey Yerua, i mekim dispela singaut long toktok bilong em long Mosbi Insevis Koles long makim pinis bilong Literesi wik long las Fraide.

Edukesen Dipatmen i makim wanpela wik long olgeta yia olsem literesi wik. Olgeta skul long kantri i save makim dispela taim long karimaut ol program na ol samting long makim Literesi wik long en.

Mista Yerua i askim olgeta pipel long kantri, provins, distrik, komyuniti, famili na wanwan manmeri na pikinini long helpim na mekim wanwan manmeri na pikinini i save long rit na rait.

Em i tok tenkyu i go long ol Non Gavman Ogenaisesen na ol sios long sapotim na ranim ol literesi skul program na aweanes bilong ol bikpela manmeri i ken skruim save bilong rit na rait.

PNG i gat planti manmeri na pikinini husat i no save long rit na rait. Kantri i gat moa long 4 milien pipel. Long dispela namba, Mista Yerua i tok i no save long rit na rait. Em i tok tu olsem 30 pesen long ol pikinini i no skul insait long kantri.

Insait long Pasifik rijon, PNG i stap long top lista we i gat planti pipel husat i no save long rit na rait wantaim 48 pesen mak. Dispel i min olsem long 100 pipel, 48 i no inap long rit na rait.

Mista Yerua i tok bikpela tingting bilong literesi aweanes em long kamapim ol program we bai i skruim save na tingting bilong ol pikinini, yangpela, ol meri na olgeta arapela lain moa.

Em i tok sapos ol manmeri na pikinini i save long rit na rait dispela i ken helpim long daunim hevi long planti likliki bebi i dai long kantri, daunim pasin bilong karim ol pikinini klostu klostu, na planti arapela samting.

# RAMU RAMU RAMU RAMU SUGAR

I love Ramu  
in cakes!



SEE OUR STAND  
AT THE 1997

PNG MADE TRADE FAIR



**Oi Lak papa graun baim Kavieng Hotel**

WANPELA kampani bilong ol papa graun long Lak eria insait long Niu Ailan provins, ol i kolim long Metlak Developmen Koperesen (MDK) i baim pinis Kavieng Primia hotel. Na long Septemba 6, ol i tekova long Shane Jenkison's Kavieng Adventure Tours.

**WENCESLAUS MAGUN**  
i raitim

Long 1954 ol famili bilong Michael Meehan i wokim Kavieng Primia hotel.

Dispela hotel i stap long namel bilong Kavieng taun. Tasol bihain Mike Gallen i baim na nau i putim long tenda long moa long K1 milion na MDK i baim. Nau yet Mista Gallen bai ronim hotel inap long 12-pela mun na bihain i lusim long han bilong ol MDK. MDK i lusim bikpela mani long baim menesmen na ol saveman husat i helpim ol long ronim bisnis.

Dispela em i namba tu kampani bilong ol papa graun long baim na ronim hotel long Kavieng. Namba wan papa graun kampani em ol lain long Susurunga-Tanglamet ilektoret husat i go pas long kamapim Malagan Lodge wantaim Niu Ailan Provinsel Gavman. Tasol ol i salim pinis olgeta sia bilong ol na nau Niu Ailan Provinsel Gavman tasol i papa bilong Malagan Lodge.

Long 1980, 14-pela ples long Lambom inap long Kavieng i bung wantaim na kamapim MDK. I gat 47 sia holda i makim ol bikpela klen long MDK. MDK i givim tok orait long ol ausait lain i ken baim sia long kampani bilong ol.

Lak em wanpela bikpela eria long Niu Ailan we ol kampani i kam kisim diwai. Na ol pipel i yusim wanem samting ol i kisim long timba long mekim bisnis. Long 1991 gavman i givim 10 yia timba rait permit i go long Lak. Ol i gat foapela moa yia i stap


bilong dispela kontrak i pinis. Bihain long dispela ol pipel bilong Lak i mas painim narapela rot bilong kisim mani.

Man husat i tokaut long bisnis bilong Metlak, Mema bilong Lak long Niu Ailan Provinsel Gavman, Esekiel Waisale i tok, ol pipel bilong em i no bin mekim bisnis inap long longpela taim tru. Em i tok wanem ol liklik bisnis ol i gat, ol i save mekim wantaim ol lain long Rabaul. Tasol nau ol i kirap long mekim bisnis.

Narapela bikpela bisnis MDK i mekim em long baim Metlik plen-tesin-long samting olsem K150,000 na ol i tingting long lisim dispela graun. Mista Waisale i tok, dispela em i gutpela rot bilong mekim mani long taim bihain. Ol i statim tu wanpela somil. "Metlak bai stat salim ol diwai ol i kisim long dispela somil long Lihir, ol arapela hap long PNG na long pinis bilong dispela mun ol bai salim namba wan lod bilong timba i go long Singapo. Gavman i givim tok orait long Metlak long katim 800,000 cubic mita long 86,000 hekta. Metlak i tingting long winim tenda bilong Danfu TRP taim ol i pinisim wok long graun bilong ol yet.

"Long 1996 ol pipel bilong mi i askim mi long sanap long ileksen olsem bai mipela i gat man i ken makim ol long gavman," Mista Waisale i tok. I kam inap tude, Mista Waisale i helpim ol pipel bilong em. Em i go pas long helpim ol Bod ov Dairekta bilong Metlak long painim rot bilong mekim bisnis. I no long taim i go pinis ol i opim rot i go long Namatai inap long Lak. Dispela rot i helpim ol pipel long baim ol ka na bot wantaim mani ol i kisim long timba royalti. Em i tok i nogat wanpela gutpela gavman sevis long Lak. Olsem na Metlak i stap olsem rot bilong helpim ol pipel

**SBDC helpim yu wantaim liklik wok bisnis**



**I KAM LONG LAS WIK**

**MAKIM GOL NA BISNIS PLEN**

WANPELA bikpela step long mekim senis o statim nupela bisnis em long klia long rot yu go. Yu ken klia long rot sapos yu kisim inap taim long makim ol plen na wanem kain kaikai o gol yu laik kamapim dispela bisnis plen blong yu.

**Wanem kain Gol o Kaikai bilong plen yu laik kamapim?**

"Wanpela gol o Kaikai bilong Plen yu laik kamapim i stiam rot bilong yu long wanem kain samting yu mas mekim."

Ol step bilong makim Gol o plen bilong yu:

- Makim gut ol gol o plen bilong yu na raitim long buk.
- Raitim wanem ol bikpela samting em yu mas mekim pas-taim, na ol arapela i kam bihain.
- Noken traim long kamapim planti gol o mekim planti samting long wanpela taim tasol.

• Raitim ol samting em yu bilip bai bagarapim sans bilong yu long mekim ol wok em plenim long kamapim dispela gol o kaikai.

• Raitim tu wanem ol samting em yu mas mekim long abrusim ol samting we bai bagarapim sans bilong yu long kisim dispela gol em yu plenim.

• Makim gut ol wok na wanem samting bilong mekim long mekim ol dispela gol i karim kaikai.

• Raitim ol samting em yu nidim long mekim wok long bungim dispela gol.

• Luksave long wanem kain wok yu mekim long bungim dispela gol, na raitim long buk. Dispela bai soim rot yu go long en. Na tu raitim ansa o bekim bilong ol wok em yu kamapim o mekim long bungim dispela gol.

**WANEM OL PLEN BILONG YU**

Plen em ol step o wok "bilong mekim" long bungim gol na kaikai bilong plen bilong yu. Yu ken bungim ol dispela gol long sotpela taim, olsem long 6-pela mun. Yu ken bungim tu ol dispela gol long longpela taim, olsem long tupela o tripela yia taim. Wanpela bisnis plen em i bikpela plen long lukim bisnis wok i go het.

**Bai mipela plenim long mekim wanem kain wok?**

- sapos yu gat plen, yu no inap paul long wanem samting yu laik

mekim long bungim gol bilong yu. Plen i soim yu ol nambawan samting em yu mas oltaim tingim, taim yu wok i go long bungim gol bilong yu. Na tu plen i soim yu wanem kain wok bilong mekim.

- ol plen i soim yu rot we yu bai bihainim long mekim wok bilong yu long bungim ol dispela gol em yu makim pinis.

- ol plen i helpim yu long abrusim ol hevi yu bai bungim, taim yu wok i go long bungim gol bilong yu. Bikos plen i helpim yu long luksave olsem ol hevi ya bai kamap, na yu bai redi long abrusim ol dispela birua.

- plen i helpim yu long luksave long hamas wokman meri yu gat, ol samting em bai yu yusim long wok, long helpim yu i go bungim dispela gol em yu laik kisim. Na tu plen i helpim yu long plenimmani, na ol arapela risoses em yu nidim long mekim wok.

- plen i helpim yu long makim sapos yu mekim gut wok o nogat o yu kamap klostu long bungim gol yu plenim long en o nogat.

- plen i helpim yu tu long luksave long ol nupela rot em yu ken bihainim o bungim gol bilong yu, sapos namba wan rot i givim yu planti hevi.

Long kisim moa titing na helpim long wok bilong Smol Bisnis Dvelopmen Koperesen (BDC), askim:

**Francis Dakenny**  
**SBDC Infomsen Kodineta**  
**PO Box 286**  
**Waigani. NCD**

**25th Anniversary**

**CAMBRIDGE CUP**

**THE 1997 CAMBRIDGE CUP**

**BE PART OF THE RUGBY LEAGUE ACTION!**

**P.N.G.R.F.L.**



# Salvesen Ami bikman indai



• Mesa Tau Pala (raithan) i sekanim Sir Brian husat i givim sampela mani long Red Sil April 1996.

SALVESEN Ami i lusim wanpela bikman na man husat i mekim bikipela wok long helpim ol pipel i bungim hevi long kantri.

**VERONICA HATUTASI**  
i raitim

Mesa Tau Pala i bin-holim wok olsem Jenerel

Seketeri bilong Salvesen Ami na Siaman bilong Papua Niugini Kaunsil ov Sios taim em i dai long dispela wik Mande. Em i pondaun long haus bilong em long Mande moning na taim ol i karim em i go long Mosbi Jenerel haus sik, ol dokta i tok em i dai pinis.

Leit Mesa Pala em i bilong ples Kalo insait long Sentrel provins. Em i lusim bihain meri bilong em husat i wok tu wantaim

Salvesen Ami, Mesa Noho Pala na foapela pikinini.

Meja Pala i bin sik long sampela taim bipo em i dai long dispela wik.

Bos bilong Salvesen Ami (SA) long kantri, Leftenen Kenel Keith Banks i tok SA i sori tru long lusim Meja Pala husat i mekim planti na bikipela wok long helpim ol pipel we taim nogut i bagarapim laip na sindaun bilong ol.

"Planti pipel insait long kantri i gat luksave long Mesa Pala long wok em i mekim bilong helpim komyniti na ol yangpela pipel husat i gat hevi wantaim lo, marasin nogut, nogat kaikai na ples bilong stap long en.

"Strongpela tingting na singaut bilong em i mekim na SA i go insait long wok bilong helpim

ol pipel long kantri taim hevi long bikren, biksan, graun i bruk, guria, maunten paia na ol kain samting olsem i kamap na bagarapim laip na sindaun bilong ol pipel", Kenel Banks i tok.

Mesa Pala i bin wok wantaim SA long 24 krismas bihain long em i joinim ol long 1973.

Insait long 24 krismas wantaim ol, Mesa Pala i bin holim sampela bikipela wok wantaim SA olsem Kops Opisa we i wankain olsem sios pasto, Divisenel Opisa na jenerel Seketeri.

Em bin kisim namba olsem Mema bilong Britis Empaia (MBE) long Kwin bihain em i luksave long gutpela wok Mesa Pala i mekim long helpim komyniti na ol trangu na lain i bungim hevi.

## Planti skul i pas na kaikai long stua tu i go antap tru

OL PIPEL bilong Westen Provins i kisim traim tru long traipela san. Wara Flai bipo i save solap i go antap long taiv o 10 mita nau i drai olgeta na yu no inap pul kano antap long wara. Dispela i stapim ron bilong ol sip na ol i no inap kisim kago i go long Kiunga. Balus tasol i kisim ol kago i go i kam tasol prais bilong ol samting long stua nau i antap tumas. Dispela i givim bikipela hevi tru long ol pipel.

**WENCESLAUS MAGUN**  
i raitim

Bisop bilong Daru na

Kiunga daiosis, Gerard Joseph Deschamps SMM i tok dispela hevi i mekim na planti ol skul i pas. Em i tok i luk olsem wanpela o tupela klas tasol i go het bikos ol skul pikinini i mas redim ol yet bilong kisim tes. Narapela bikipela hevi tru ol i bungim em ol wokman bilong haus sik i sot tru long marasin. Bisop Deschamps i tok tu olsem bikos long traipela san planti hap i drai na ol pipel i mekim paia nabaut na i kukim planti hap. Wanpela ripot i kam long opis



• Praim Minista Bill Skate i toktok long Independens Hill, Mosbi taim ol soldia i apim fleg long makim 22 krismas bilong PNG. Em i tok gavman i givim K30 milien pinis long helpim ol pipel.

bilong em i soim olsem paia i kukim samting olsem 66 haus bilong ol refuji long wanpela kem bilong ol long wara Flai. Insait long ol dispela haus i paia em wanpela haus sik, klab bilong ol meri na wanpela haus lotu.

Bisop Deschamps i tok nau yet em i no harim olsem wanpela man i dai long dispela hevi. Tasol em i tok daiosis bilong em i go het pinis na kamapim wanpela komiti bilong glasim dispela hevi na painim rot bilong helpim

ol pipel. Em i tok sapos dispela san i go het yet planti bikipela hevi inap kamap.

Namba tu Katolik Edukesen Sekreteri long Westen Hailans, Greg Kaikes i tok, traipela san i mekim na planti wara long Westen Hailans i drai. Long dispel as ol pikinini i nogat wara bilong dring long skul. Em i tok kaikai i sot long sampela hap, olsem na ol i tokim ol tisa long tis inap long belo na pasim skul.

"Dispela hevi i stap inap long tupela mun


pinis na sapos em i go het yet, ating bai mipela i mas pasim ol skul," Mista Kaikes i tok. Em i tok nau yet ol i askim ol pikinini long bringim wara bilong ol yet bilong dring long skul.

Mist Kaikes i tok ol skul i kisim bikipela bagarap tru em insait long Tambul eria. Em i tok long dispela hap, ais i pundaun, san i strong tru na mekim ol wara i drai. Em i tok ais wantaim strongpela san na nogat ren i bagarapim planti ol kaikai long gaden.

# Ol i noken sasim yu moa long olgeta stoa!




15<sup>t</sup>



15<sup>t</sup>



15<sup>t</sup>



15<sup>t</sup>



10<sup>t</sup>

## Sapos ol i askim moa... go long narapela stoa!



## Leba Lida egensim Fiji long joinim gen Komonwel

Fiji: Bikipela kibung bilong ol Komonwel memba kantri bai kamap long neks mun, Oktoba, long Gret Briten. Na Briten i tokaut pinis olsem em bai sapatim askim bilong Fiji long joinim gen ol Komonwel kantri.

Leba Pati lida bilong Fiji, Mahendra Chaudhry, i go pinis long India. Na laik tokim India long noken harim tok gris long Fiji long kamap memba gen bilong ol Komonwel kantri. Dispela raun bilong em i go long India i kamap bihain tasol long India i tokaut olsem em bai sapatim Fiji long joinim gen Komonwel.

Oposisen lida bilong Fiji, Jai

Ram Reddy, i bin go pas long India. Na putim tok gris i go long India long givim sapat long Fiji i kamap memba gen bilong Komonwel.

Leba Lida Chaudhry i tok em bai no gutpela long bringim Fiji i go bek long Komonwel, taim Fiji i no mekim gutpela pasin long ol India pipel long Fiji ailan.

Long sampela yia i go pinis, Sitiveni Rabuka, husat i praim minista nau, i bin yusim ol soldia long tekova long gavman, em ol India pipel long ailan i go pas long en. Em i mekim olsem bikos em lukim olsem ol India pipel i tekova long pawa long han bilong ol asples Fiji

pipel.

Bihain long dispela, Rabuka i fomim gavman na kamap praim minista. Na odarim nupela gavman bilong em long senisim mama lo bilong kantri, we i givim moa pawa nau long ol asples Fiji pipel.

Chaudhry i tok dispela pasin i no gutpela long ol India pipel long Fiji ailan. Em i tok pasin bilong mama lo i no givim wankain sans long ol India pipel bai stap yet inap yia 2000.

Em i raitim wanpela pas i go pinis long seketeri jenerel bilong Komonwel, Sief Emeka Anyaoku, na tokaut long tingting olsem Fiji long noken

kamap memba bilong Komonwel.

Ol Komonwel kantri i kisim Kwin bilong Gret Briten, Elizabeth II olsem het bilong Stet, we gavana jenerel i makim long wanwan memba kantri. Na Komonwel i no sapatim pasin bilong wanwan ples, kalsa, kain kain kala skin na tokples i egensim ol yet. Olgeta i mas stap wantaim wankain sans long wok politik, bisnis, na amamas wantaim olsem wanpela pipel tasol.

Papua Niugini em i wanpela memba tu bilong ol Komonwel kantri.

Ripot i kam long PACNEWS

## OL WANSOLWARA NIUS

### Raun bilong Solomon Ailan praim minista long PNG kisim tok kros

**SOLOMON AILAN:** Oposisen Lida bilong Solomon Ailan Palamen, Danny Philip, i tok em i no amamas long limlimbur bilong nupela Praim Minista, Bartolomew Ulufa'alu i kam long Papua Niugini long las wik. Danny Philip i tok raun bilong praim minista i kam long PNG i no long stretpela taim. Na tu i nogat gutpela as bilong en.

Em i tok praim minista i no tokaut yet long tingting o plen bilong em long hevi i kamap long Bogevil ailan, namel long PNG gavman na ol rebel paitman. Em i tok dispela i mas kamap ples kila, bipo praim minista i kam long PNG.

PNG i tilim boda wantaim Solomon Ailan. Na planti bagarap i bin kamap long boda eria bilong Solomon Ailan, bihain long ol PNG Difens Fos soldia i go insait, na painim ol rebel paitman bilong Bogenvil Revolusinari Ami (BRA).

Long raun bilong praim minista i kam long kantri, PNG Praim Minista Bill Skate i givim K10 milien olsem kompensesen mani i go long Solomon Ailan. Dispela em long baim ol bagarap em PNGDF soldia i kamapim long boda eria bilong Solomon Ailan.

Praim Minista Ulufa'alu i tokaut tu olsem nupela gavman bilong em bai wokbung wantaim PNG gavman long stretim hevi long Bogenvil ailan. Dispela i bin wanpela gutpela nius tru we PNG gavman na pipel i welkamim.

Bihainim dispela ripot, Praim Minista Ulufa'alu itok gavman bilong em bai tokaut long pablik hamas mani em bai tromoi long wok bilong stretim Bogenvil ailan hevi. Em i tok olpela gavman i no bin mekim olsem, we i no gutpela.

Em i tok nupela gavman bai tokaut long man i go olsem wanem long hevi we i bagarapim laip na sindaun bilong ol tu.

### Kot egensim 2000 moa pipel long kamap asples pipel

**AMERIKEN SAMOA:** Moa long 2000 pipel bilong ol arapela kantri i stap nau long liklik ailan kantri long wansolwara, em ol i kolim long Ameriken Samoa. Long stat bilong dispela mun, gavman i bin givim tokorait long ol dispela 2,391 pipel i stap long ailan olsem ol asples pipel.

Bipo long dispela tokorait bilong gavman, Bikipela Kot long ailan i givim tokorait olsem gavman i nogat pawa anit long lo bilong kantri long givim yesa long dispela 2000 na moa pipel long stap long ailan. Bikipela Kot i givim oda olsem gavman i mas rausim dispela yesa em bin givim.

**Vanuatu bai sanapim kokonas faktori**  
VANUATU: Gavman bilong Vanuatu i stretim ol toktok nau na plen long sanapim wanpela kokonas faktori.

Nau yet em tripela saveman bilong kantri Isrel i stap nau long Vanuatu. Ol saveman ya bai helpim gavman bilong Vanuatu long sanapim wanpela faktori bilong wokim ol samting long kokonas olsem sop, susu bilong kokonas long grisim ol kaikai, na sampela moa.

Dispela tripela saveman i bin kamap long Vanuatu long las wiken. Ripot i tok dispela fakori bai sanap long Santo ailan.

Vanatu em wanpela kantri olsem Papua Niugini na ol arapela wansolwara ailan kantri husat i gat planti kokonas. Na kain bisnis wok i ken givim planti wok long ol manmeri. Na tu ken pulim moa mani i kam insait long kantri.

### Fiji egensim Nu Silan niusman

Fiji: Gavman bilong Fiji i no oraitim wanpela top niusman bilong Nu Silan long wok long Suva, biktaun o siti bilong Fiji. Nem bilong dispela niusman em Mike Field.

Ripot i tok Herald niuspepa bilong Nu Silan i makim Field long lukautim opis bilong em long Suva.

Tasol Imaigresen Dipatmen bilong Fiji raitim wanpela pas i go long Field long las mun, Ogas 27, na tokaut olsem em i no oraitim Field long wok insait long Suva.

Long mun Me long las yia, ol gavman wokman bilong Imaigresen i tambuim Field long stap long Fiji, bihain long em i pundaun long balus long Nadi Intanesenel Ples balus. Ol i tokim Field olsem nem bilong em i stap long 'blakpela lista' we i gat nem bilong ol pipel em gavman i no laikim long stap long Fiji.

Ripot i kam long PACNEWS

## 93FM YUMI Redio Stesen bilong yumi yet Harim olgeta gutpela program long 93FM YUMI

- \* Olgeta lokol sing sing, na ol musik bilong bipo yet
- \* PNG Motors prais bilong kes krop
- \* Yamaha Provinsel weda ripot
- \* BSP liklik bisnisman ripot
- \* Pepsi lunch hour rikwest
- \* City Pharmacy Lukaut bilong bebi
- \* Post (PNG) Ron bilong ol Sip
- \* Ela Motors kantri kaundaun
- \* American God
- \* Sande Gospol so

Em rait redio stesen ikamap  
pinis harim long tok ples bilong  
yumi yet, 93FM YUMI

Salim rekwest i kam long: YUMI request

Locked Bag 93  
Port Moresby, NCD.  
Fax: 320 1995

PNG FM PTY. LTD.  
Trading as  
NAU FM and YUMI FM  
P.O. Box 774,  
Port Moresby,  
Papua New Guinea  
Ph: (675) 320 1996  
Fax: (675) 320 1995



# LAI PSTAIL

## KANAGE

"Em  
nau,  
narapela wik  
bilang mi ken"



■ Kanage bilong Munawai long Karanas Kantri, Kavieng. Wanpela taim em kalap long F28 balus i go long Mosbi. Insait long balus, air hostes meri kam na givim dring na bred long ol pasindia. Kanage lukim olsem na i no amamas. Bikos em i no kaikai na kalap long balus. Na kain kaikai i no inap mekim em i pulap. Taim air hostes i kamap long hap Kanage i sindaun, Kanage askim meri ya: "Hei meri wantok! I gat sampela kol rais bilong asde i stap?"

**Sori Ducks  
KAVIENG**

■ Yangpela Kanage hap blut bilong Bogia long Madang provinss na Kerema long Galp provinss. Papamama putim em long pri skul long Gaden Hills. Pes taim em save amamas stret long skul. Taim olgeta i slip yet, em bai kirap, waswas, na redi pinis long bikmoning yet. Em mekim olsem i go na bihain papamama lukim olsem em i senis. Em save kirap leit tru. Na bai les long waswas long kol wara.

Wanpela de papa go lusim em long skul na em les. Em krai krai na ol kisim em i go bek long haus. Em tok em les long skul bikos "ol save singsing tasol na i no save lainim ABC."

**Junior Snake  
5 Mile, MOSBI**

■ Wanpela Sande moning Kanage lusim haus na wokabaut i go long Dagua maket long Wewak. Long rot ol mangi tokim em olsem Kolwin pawa ben i pairap long Dagua maket.

Em harim olsem na sisti i go kamap long hap ben i pilai long en. Em hap man tu bilong danis ya. Olsem na em i no malolo. Kwik wan em go insait na lukim olsem nogat manmeri i danis. Yu save, bikpela san ya. Olsem na ol manmeri sanap tasol na lukluk i stap. Tasol Kanage i ron long longpela rot ya. Em go insait tasol na stat long sekim bodi. Yu tok long kain kain stail olsem bilong John Travolta o Michael Jackson, Kanage em holim na stap.

Em sekim i go na ol manmeri na pikinini i lukim na singaut. Olgeta i amamas long kainkain stail olsem bilong em. Tasol nogat wanpela meri i aigris o tromoi ai long em, olsem em i tingim. Em bel kaskas na wokabaut i go ausait long maket ples na singaut i go bek long ol manmeri: "Olsem wanem! I ga tsampela luksave o nogat!"

**Jacob Denny  
WEWAK**

■ Kanage i bilong Okapa distrik long Isten Hailans provinss. Yu save, kain bilong Kanage ya. Man karim smok mariwana na gumi i go long raun wara na lukstil long meri bilong ol tisa waswas i stap.

Em hait long as bilong ol pitpit na spai i stap. Ol meri lukim em pinis na go tokim man bilong ol i kam banisim na holim em. Ol paitim em nogut tru. Na rausim olgeta gras long tupela sait bilong het bilong em, na raitim olsem: "Mariwana pes na gumi pes". Bihain ol karim em i go long plis stesin.

Plis sekim em na kisim 7-pela kondom na wanpela lip mariwana. Plis belhat na givim em dispela 7-pela kondom na 5-pela lip mariwana, na tokim em long kaikai. Taim em kaikai ol mariwana na gumi, em smait wantaim na tokim ol plisman: "Mona ya, mi namba wan man bilong hailans long kaikai gumi na 5-pela lip mariwana. Mipela ol hailans i gat nem long kaikai 7-pela kondom insait long Papua Niugini. Yupela ol plisman, harim dispela na tokim mejistret."

**Das Mangi  
GOROKA**

• Lukim moa tokpilai wantaim Kanage long pes 16.

## Hotpela San na paia daunim 4-pela haus

SINDAUN long siti, taun, viles, rurel na uben komuniti i ken kamap gut sapos gutpela taim bilong san na ren i pundaun antap long ol dispela ples. Tasol dispela tupela samting i ken kamapim bagarap - liklik bagarap o bikpela bagarap.

Sapos ren i pundaun long sampela eria longpela taim, bai yumi i ken lukim bikpela haiwara we iken kamapim ol kainkain bagarap long ol haus, gaden na laip tu namel long ol enimol na pipol tu bai i ken painim planti birua. Long taim bilong san, wankain pasin bilong painim planti bagarap tu bai i ken kamap. Wara bai drai, gaden bai drai nabaut na ol diwai na gras tu ba drai. Na sapos ol manmeri o pikinini i laik pilai pilai

long kamapim ol paia long gras a bus, sori tumas dispela paia taim ol i laitim i ken bruk aut na bagarapim planti samting na tu i ken kamapim birua long laip bilong ol manmeri na pikinini.

Nau yet insait long Isten hailans, ol pipol long hia i wok long kisim taim stret bikos bikpela san i stap inap planti mn i go pinis. Planti pipel long viles i wok long komplek na taim ol i luksave olsem kaikai gaden bilong ol i wok long drai na tu ol wara we ol i save yumi long dring, kukim kaikai na waswas long en i drai ap. Mekim olsem na laip bilong ol manmeri na pikinini i kamap het tru nau.

Sampela bagarap tu i kamap pinis insait long provins taim ol mian na mri i kamapim

paia long laik. Na sapos ol dispela kain man na meri i no inap stopim pasin bilong ol long laitim paia nabaut, planti moa bagarap long ol haus na gaden bai iken kamap. Wanpela viles o haus lain em Geharoka long Kefamo autsait tasol long Goroka taun i kisim taim pinis taim 4-pela femili i lusim 4-pela haus kunai bilong ol long birua bilong paia.

Dispela birua i bin kamap tupela wik i go pinis taim ol man husat i no gat gutpela tingting i bin statim paia long ol gras i drai long em sampela 100 mita longwe long Geharoka viles. Paia ya i bruk aut na i go insait long viles we i gat mao long 15-pela haus, wanpela tred stua na haus lojtu na i daunim 4-pela haus. Viles man na Tred Stua ona Joe Losea husat i bin i stap long viles taim paia kamap i tok laki tru na ol dispela 4-pela femili i no bin i stap insait long haus kunai bilong ol taim paia kamap na kukim haus bilong ol.

Em i tok insait long dispela birua bilong paia, ol dispela 4-pela femili i lusim mani na ol kago samting inap moa long K1,000.

Losea husat i lusim haus kunai bilong em tu long dispela paia i tok ol arapela haus kunai long viles tu inap long paia olgeta, tasol em yet wantaim ol arapela wantok bilong en i putim aut sampela paia na stapim paia long kukim moa haus. Losea i tok sapos sam i strong na i sap olsem i luk olsem planti man na meri bai bungim taim nogut bilong hangre.

Em i tok planti kaikai gaden long viles i drai olgeta na ol pipol long haus lain i kisim taim i stap. Taim mi go lukluk raun long ol viles klostu na arere long Goroka taun, mi pilim sori tru bikos laip na sindaun bilong ol pipol long viles i kamap nogut tru.

Sapos dispela drai sisen i go het yet long ol mun i kam bihain, tru tumas sampela manmeri na pikinini bai lusim laip bilong ol.

Paia stesin long Goroka taun i givim tok lukaut na apil tu long ol man na meri long noken kamapim paia nabaut long ol gras klostu long taun na viles.



• ples man long Geharoha haus lain long Kefamo, Joe Losea na pikinini meri bilong em, Zenna i sindaun na lukluk long kopi masin bilong em we paia i bin bagarapim. Em i sindaun namel stret long hap we haus kunai bilong em i bin paia i go daun.

## San na ais i bagarapim gaden kaikai

### BARUNG KMARA i raitim

LONG Fraide 5, September 1997, mi lukim dei i kamap nogut tru winim arapela dei i kam go pinis. Mi lukim long dispela taim gaden kaikai i senisim kala i go blak olgeta kwik taim tru bihain tasol long mi harim bikpela nois - bikmaus wantaim kurai kamap long olgeta hap isnait long Pale viles, lalibu, SHP.

Samting olsem, 8 klok moning wanpla pasto bilong Pale yet i tok - yu holim wanpela liklik plastik beg na yu kam wantaim mi long dispela hap.

Taim mitupela i go kamap long wanpela gaden bilong en i mitupela lukim olgeta kaukau lif i kamap olsem man i kap-saitim oil antap long ol. Ol kaukau lif i tanim i go blak olgeta na sain nogut tru.

Na mitupela wokabaut go insait long gaden mitupela lukim olgeta kaikai olsem taro,

potato, kabage, suga ken na painpol olgeta ais i lukim pinis long nait yet na putim i stap. Lif bilong suga ken i kama yelo.

San tu i kamap red long klia skai na daunim olgeta dispela kaikai isi go daun na laik kamap das. Mitupela sanap yet long gaden na mitupela lukim dispela samting kamap.

Turangau pasto Yamba i karai na lukim luk i go yet. Ol sampela wokman, meri bilong em tu ol i kam pes na sindaun bilong em tu ol i kam pes na sindaun kra i stap long seim gaden. Na mi lukim wanpela lida man Yake i kamap long gaden wea mipela i stap long en. Em i tok: "Mi lukim gaden bilong mi na mi poret tru na ranawe kam. Bikpela bagarap kamap long gaden bilong mi tu na mi wari tru."

Mi na save bai mi mekim wanem. Olgeta gaden kaikai bilong mi bagarap long nau nait.

Narapela man tu i stap long seim gaden, em long wanpela

wok man bilong pasta Yaba. Em tok, nau yet long moning taim mi snap long mauntain kaukau na mi lukluk go olgeta hap, na mi lukim olgeta gaden klia wari - bagarap kamap long olgeta gaden. Na olgeta gaden bilong viles Raukare tu i kuk pinis. Em tok, "Mi poret na mi laik ron awe go long sampela hap."

Insait long seim gaden, mi lukim ol 3-pela meri i stap. Wanpela yangpela wanpela i gat pikinini inap krismas bilong en olsem 405, olgeta meri ya ol karim emti bilum na sindaun karar i stap. Dispela pikinini i wok long digim das graun na wok long painim kaukau i stap.

Long belo, mi lukim olgeta lif bilong kaukau i drai. Na mi lukluk i go long bik rot mi no lukim ol man o meri pikinini go kam. OL i no i stap na ol go hait. Ples kamap koaet tru na ples i kamap olsem pait na birua ples.

Long wan klok mi wokabaut i go kamap ples Yarena. Mi

lukim dispela ples tu i kamap wan kain olsem Pale bihain long Awinun, samting olsem 3-klok mi kam bek long Pale. Namel long Pale na Yarena olgeta gras na diwai ol Paiya i bagarapim pinis.

Long dispela hap mi lukluk go na mi lukim sampela pipel long Ralu ol i no wari long dispela bagarap kamap. Long hot san ol wok yet long redim graun na laik planim kaukau gen.

Yes, sampela manmeri ol tok ong 1972 ais i no pundaun antap long pels olsem Raubare tasol nau ais i go antap. Na tu ol tok i moa ples bipo ais i no bin kamap long en i nau dispela ais i karamapim ol dispela ples tu.

Ol pipel bilong ol lalibu, ol planti pipel i sot pinis long kaikai na wara. Tasol nau yet ol kisim kaikai wea ais i kukim pinis long en luk olsem, inait long dispela mun Septemba yet moa pipel bai kisim bagarapim.

### INSAIT

- REBO NA SPAIK MAIK KOMIK - P14
- MAMBU I GAT KIK LONG KUKIM KAIKAI - P13
- MUSIUK BEN BILONG ORO - P12
- PAINIM PENPREN - P13 NA 15






# TOP 20

## This Week!

L/W	T/W	SONG	ARTIST
1	1	ERE BINI TU	KABANI
3	2	LESE MORI	AZZIMBAH
4	3	MAI TAURI AU	KABANI
2	4	O/ RAUSIM	K. PINERI
7	5	FROOKS LONG MI	AZZIMBAH
5	6	AZZIMBAH	AZZIMBAH
6	7	SHERRY	SERO SEREV
10	8	OVAVINE	AZZIMBAH
9	9	MERI DOI	C. KUSKUS
15	10	BOMANA	AZZIMBAH
14	11	KALUNGE	W. TROPU
12	12	TAMOATA	QUAKES
17	13	JUSTINA	L. WALLING
11	14	MASINGE	K. PINERI
19	15	NOQU ITAU	KABANI
13	16	GIABOX BAGARAP	W. TOROPU
16	17	LAKATOI	HIRI BAND
0	18	KEPOKO	HIRI BAND
18	19	LULU	QUAKES
0	20	UNITY	F. TADO/NEIL J.



**PNG FM PTY. LTD.**  
Trading as  
**NAU FM**  
and  
**YUMI FM**

P.O. Box 774,  
Port Moresby

Papua New Guinea  
Ph: (675) 320 1996  
Fax: (675) 320 1995

# Tosega strongim string ben stail bilong Oro



## MUSIK

...ol Sauga stail go wantaim

JAMES KILA i raitim

LONG narep long las mun Wantok Niuspepa i bin bringim wanpela stori bilong sampela ol yangpela man bilong ples Garuro long Oro provins husat i bin wokabaut bihainim Kokoda Trail i go long Mosbi long rekot.


Yes, ol dispela taim Tosega stringben i pinis rekot wantaim Chin H Meen long Mosbi na kaset bilong ol i bringim stret lokal stringben stail bilong Oro. Ol stail bilong musik bilong ol i wankain olsem ol lokal stail bilong Oro provins, tasol noken tingting tumas, ol lain ya i kukim stret long stail bilong Garuro na Sauga stail stret.

Yes, ol lain memba bilong Tosega ben i bin wokabaut 3-pela de na 3-pela nail bihain Kokoda Trail i go long Mosbi bikos ol i gat bikpela tingting tru long rekot. Ol i bin mekim dispela wokabaut bikos planti ol lain ol i bin askim long helpim ol i no soim intares tumas.

Wanpela song bilong ol we i gat bikpela bilip olsem bai winim lewa bilong planti ol manmeri em Apana Arerona. Man husat i save pilai wantaim Tosega stringben long bipo, Allan Lee Herove i bin mekim dispela song i kamap bikpela long kantri taim em i miksim ol tokples i go wantaim wanpela top song bilong em Sauga Mei.

Insait long dispela nupela stringben album bilong ol lain Tosega i Allan i bin helpim tu long pilai ol lid gita. Bagaros i soim stail bilong stringben stret na sapos yu harim bai yu salim tingting stret. Tosega stringben i bin stat long 1986. Ol lain husat i bin statim ben em Allan Lee Herove na Lester Pupura na ol sampela ol yangpela man long ples.

Ol i save pilai raun long ol pati long ples nabaut. Bihain ol i bin go long NBC Radio



Tosega string benbilong Oro provins i wakabaut na kamap long Mosbi long katim kaset wantaim Chin H Meen studio long dispela wik.

Noten na rekotim 3-pela kaset bilong ol.

Long dispela taim kaset bilong ol i no strong tumas bikos, sampela ol narapela ben olsem Eroro Nataba, BS Riverside na ol narapela i bin go pas na winim lewa bilong ol manmeri pinis.

Gulpela kata na piksa bilong Tosega stringben i bin kamap ples klia taim Allan Herove i bin paripim musik bilong Saugas ben.

Em i tok em i bin laik kolim ben bilong em Tosega tasol, bihain em i kolim Sauga long bungim olgeta lain wan-pisin insait long erla bilong ol.

Mining bilong dispela niem "Tosega" i min olsem ol 4-pela lain kien o haus-lain insait long Garuro viles. Ol dispela haus-lain em Tojerepa, Sevesopa, Egapa na Gariapa.

Nau yet ol lain memba bilong Tosega i tingting long rekotim wanpela pop kaset.

Dispela i min olsem ol i no inap katim stringben.

Ol i bin raitim na redim pinis planti ol gulpela sirging long putim insait long dispela nupela kaset.

Taim ol memba bilong Tosega i bin wokabaut, ol i bin raitim wanpela song. Dispela song em Trail Hits Express. Dispela song ol i singim long Sauga na Tok Pisin i stori long wokabaut bilong ol long Kokoda Trail. Ol narapela song we i gat gulpela stail bilong ol em Korunga na Sifode Riegoro.

Dispela song Korunga i stori long taim wanpela man i hangere na pes bilong em i luk sore na em i palmim kaika i stap.

Ben lida Lester i tok olsem Allan Lee Herove bai i helpim ol long putim ol sampela wok bilong gita insait long dispela nupela kaset.

Man o enjinia husat i rekotim Tosega ben em Wamsi ilau.

Dispela nupela grup i gat wankain stail olsem Saugas ben stret, tasol planti ol narapela ol nupela kain stail tu i stap long mekim musik i swit long harim. Ol i singim ol song long tokples Sauga, Ewage na Tok Pisin.

Ol i dediketim kaset i go long ol olpela memba bilong grup olsem Stanley Sesevo, Jawoko, Reginald Woiva na Jangopa.

Man husat i rekotim ol lain Tosega stringben, Wamsi ilau i tok olsem dispela ol lain yangpela bilong Garuro viles i soim gulpela pasin long taim bilong rekot na em i bilip olsem kaset bilong ol bai go gut tru long maket long PNG.

Wamsi i tok tu olsem olgeta memba bilong Tosega i stap long Kristen yut grup long ples bilong olsem na royalti mohi ol i kisim long dispela rekotim bai go long sapatim ol yut wok na ol Kristen felosip long erla bilong ol.



# Mambu tu i gat kik

LONG pasin bilong kukim ol kaikai nabaut, i gat kainkain we na stail.

Nau yumi i stap long save na taim bilong ol waitman we yumi i kisim planti save pinis long kukim kaikai na yusim ol samting olsem pot, prai pan, spun, naip, plet, kap na planti ol arapela samting bilong kit-sen.

Na tu yumi i save kukim planti kaikai bilong ol waitman olsem rais, tinpis, tin mit, ais mit, sosis na ol arapela kaikai bilong stua we yumi i save yusim ol kitsen samting bilong ol waitman long kukim.

Bipo long taim bilong ol tum-buna bilong yumi, ol lapun bilong yumi i no bin i gat ol dispela kitsen samting long yusim taim ol i laik kukim kaikai bilong ol. Bikos long dispela taim ol waitman i no bin kamap na krungutim graun bilong yumi i no bin i gat ol dispela kitsen samting long yusim taim ol i laik kukim kaikai bilong ol.

Tasol long dispela taim ol tum-buna t i bin ig at ol kainkain we, pasim, stail na ol samting bilong kuk.

Nu yumi i save lukim ol pot ol waitman i wokim long kopa na ol ain nabaut. Na long bipo taim ol dispela ain pot i no kamap, ol lapun bilong yumi i

save wokim pot bilong ol yet long graun na ol i save kuk long en. Na sapos ol i no laik kuk long graun pot, ol i save kukim kaikai antap long paia nating o wokim mumu na kaikai long en.

Antap long ol kol ples long hailens ol lapun bilong bipo i no bin i gat ol kain samting olsem graun pot bikos long hia i no gat gutpela graun long wokim pot olsem na ol i gat stail bilong ol yet long kukim kaikai bilong ol. Long olgeta de pasin bilong ol long kuk em subim kaukau long si bilong paia na wokim paia antap. I no long taim ol kaukau i save tan gut tru na ol i save kamautim na kaikai.

Dispela pasin na stail stap yet. Nau yet dispela stail i stap yet long viles na long taun tu. Na pasin bilong kukim kaikai long mumu tu i stap strong yet long hailens.

Narapela stail bilong ol long kukim ol kaikai olsem kumu tu i stap strong yet. Planti taim yumi i save boitim na grisim kumu long pot na prai pan.

Tasol ol hailens i gat narapela kain stail long kukim ol kumu nabaut we 'ol i save yusim mambu. Pastaim tru bai ol i painim ol kumu na bihain bai ol i go painim ol abus olsem mit bilong pik, kakaruk, sipsip o kau mit. Em nau bai ol i katim go liklik na miksims




• **Mama Salome Avele bilong Yagana long Okapa distrik blong Isten Hailans i redim na kukim ol kumu insait long mambu long Goroka.**

wantaim kumu na bihain antap long dispela bai ol i katim kwar na subim ol dispela miks kumu na mit i go insait long mambu.

Taim mambu i pulap bai ol i wokim paia na putim mambu i go natap. Bai ol i tanim - tanim mambu antap

long paia inap samting olsem wan aua. Na taim em i kuk gut tru ol i save rausim ol kumu i kam aut, na sori tumas sapos yu laik kaikai, maski tambu bilong yu i stap klostu, bai yu givim baksait long em long wanem tes bilong em bai kik stret.



**Nem: Michael Kunda**  
**Krismas: 24**  
**Adres: House of Prayer, PO Box 501, Goroka-EHP.**  
**Save Laikim: Lukim vidio, raitim pas long ol pren, ritim niuspepa na ol arapela stori buk, wok gaden, na stap wanbel wantaim ol famili. Nau yet mi painim, wanpela meri long marit.**

**Nem: Priscilla Pangall**  
**Krismas: 16**  
**Adres: PO Box 76, Lae, Morobe Province.**  
**Save Laikim: Pilai sofbal, raun wantaim ol pren na senisim poto.**

**Nem: Oksi Namana**  
**Krismas: 22 (man)**  
**Adres: Kalvari Lutheran Church, PO Box 770, Lae, Morobe Province.**

**Save Laikim: Go lotu long Sande, ritim Baibel, harim lotu singsing, tok pilai wantaim ol pren, salim pas ong ol pen na senisim presen. Nua yet mi painim wanpela gutpela meri long maritim.**

**Nem: Kwalu Gabi**  
**Krismas: 19**  
**Adres: PO Box 213, Lae, Morobe Province.**

**Save Laikim: Mi save laikim long ronim hos na tu painim penpren na raitim pas long ol. Mi bai amamas tasol long bekim ol pas em mi kisim.**

**Nem: Vero Nime Michael**  
**Krismas: 15**  
**Adres: House of Prayer, PO Box 501, Goroka-EHP.**

**Save Laikim: Lukim vidio, raitim pas long ol penpren, tok pilai wantaim ol pren, raun wantaim ol pren.**

• **Lukim moa penpren long pes 15**

**RICE**  
*That's right*







# Bik Bro

# REBO



OL RASKOL I KAPSAIT NA OL I KISIM BIKPELA BAGARAP...

TCH-TCH! OL INO KEA TRU LONG LAIF BILONG OL!



SINGAUTIM AMBALANS I KAM ... TRIPELA RASKOL YAH I NO INAP RAUN MOA!

YUMI LET PINIS..

...BEIS.. SINGAUTIM AMBALANS I KAM LONG KOKI, OVA..

POLIS I KAM KAMAP NARINGIM AMBALANS TASOL LONG KARIM OL I GO LONG HAUS SIK...



HARIAP TRU NA AMBALANS I KAM KARIM OL I GO ...

WEEEEEEEEEEAAAAA AAAAAA

... TASOL LONG HAP ROT NA TRIPELA RASKOL INDAI ...



LONG MONING REBO BAIM NIUSPEPA NA KIRAP NOGUT LONG RI TIM STORI LONG FRAN PES BILONG PEPA ...

OH-NO! OL RASKOL I NO TINGIM LAIP BILONG OL!

WANTOK  
A-PELA RASKOL ROBIM BENKI DAI PINIS



BILONG WANEM NA OL I MEKIM DISPELA KAIN PASIN? OL RISKIM TRU LAIP BILONG OL!

MI MAS BLEMIM GAVMAN LONG INDAI BILONG OL ... NOGAT EMPLOYMENT NA OL I TANIM STIL MAN!



... NA TU TINGIM MAMAPAPA BILONG OL BOIS, YAH! EDUKESEN BILONG OL I LUS NATING! OL I SPENDIM MONI...

Igo moa Neks Wik!!



# SIPAK MAIK



SAPOS YU LAIKIM BIA BILONG YU, YU KAM LONG STESIN NA YUMI STRETIM!

OL POLIS REIDIM TAKASOP BILONG MAIK NA KARIM OLGETA BIA IGO LONG STESIN...



MI NO INAP CIVAP! BAI MI GOPAIT LONG RAIT BILONG MI!

THUD!

MAIK I BEHATNA PROMIS LONG SALSENSIM OL LONG KOT..



NEKS DE MAIK I DRESAP NA GO LUKIM LOYA BILONG EM ...

KON LOYAS PTY. LTD

... ORAIT MAIK, WANEM WE NA AS LONG MI PAIT LONG OL?

ER.. INHIUMEN TRITMEN NA NO PROPA WARRANT LONG SERCHIM HAUS...



MAN! EM OL SIRIES ALEGESENS YAH! TCH! TCH! EM LONG DISPELA META BAI MI HITIM OL STRET!

EM NAU!



OL I BIN HARESIM MI OLSEM MI WANPELA HADKOR KRIMINAL! @\*?!

THUMP!



OL I MEKIM MI OLSEM WANPELA LOU DAUN KOMAN KRIMINOL! @\*!?! MI LAIKIM JESTIS!!

HOI, ISI, YAH! MI NO ENEMI BILONG YU! ISI!!

Igo moa Neks Wik!!



Ripota Veronica Hatutasi i putim wantaim dispela ripot

# Kisim save em ansa bilong planti askim



**LAS WIK** ol skul long Papua Niugini i holim nesanel literesi wik. Dispela em wik we i strongim tingting na bilip bilong lainim moa pikinini long rit na rait. Wantaim edukesen rifom em gavman i kamapim pinis, i gat moa hevi yet long skulim moa pikinini long rit na rait. Rit na rait em i ansa bilong save long rait bilong wanwan manmeri, na stap insait long ol developmen i kamap long kantri. Dispela ripot em Yunaited Nesens (UN) i putim wantaim i toktok long wok bilong literesi na edukesen, we mipela long Papua Niugini i ken idsim skul long en. Dispela ripot i stap long wanpela buk ol i kolim long tok Inglis olsem *The Progress of Nations - 1997*.

Tripela yia na klostu yumi bungim yia 2000. Tasol planti pikinini i no skul yet. UN ripot i tokaut olsem 140 milien pikinini long wol i no skul, maski gavman i traime hat long skulim planti pikinini bipo long yia 2000.

Planti pikinini husat i stap long skul i bungim hevi. Bikos i nogat inap klasrum, ol dek bilong sindaun long en, nogat inap spes, sok, slet na ol samting bilong rait long ol.

Insait long las 20 yia taim planti kantri i resis long kirapim moa skul na tisa, stended o mak bilong edukesen i go daun. Planti pikinini i stap long skul i no min olsem stended bilong edukesen i kamap gut moa. Nau em i taim bilong glasim, skelim na lukluk moa long wanem samting i save kamap insait long klasrum.

Olsem wanem na bai yumi mekim ol manmeri i klia gut long rait bilong ol? Kamapim gutpela sosel na ikonmik

developmen? Piniisim ol wanpisin pait? Stapim pasin we ol i lukdaun long ol meri, pikinini wok, bagarapim ol pikinini na givim hop long ol pikinini we i wok long groap long wol we i wok long go narakain nau.

Ansa em edukesen o skul. Gutpela skul long kisim save we bai redim ol long stap insait long ol wok developmen long kantri bilong ol yet, na tu long ol ausait kantri.

Edukesen o skul em i wanpela rait bilong ol pipel. Na Yunaited Nesens i gat sata o tok promis long lukautim dispela rait. Sapos nogat ol dispela tok promis i stap, em bai hat tru long daunim ol hevi we i wok long kamap long olgeta hap bilong wol itude.

Skul i no bilong skulim ol pikinini long rit na rait tasol, nogat. Skul i bilong skulim tu ol pikinini long save long rait bilong ol.

Intanesenel Leba Ogenaisenen i tok gutpela rot long stapim pasin bilong moa yangpela manmeri painim wok, em long strongim wok bilong skulim moa pikinini. Planti kantri i no bihainim promis we ol i bin mekim long wanpela bikpela bung long 1990, em ol i kolim long Wol Samit bilong ol Pikinini. Insait long dispela kibung, ol bin promis olsem long yia 2000 bai planti pikinini i skul. Nau yet, 140 milien pikinini i no skul. Na moa long wan bilien bikpela manmeri i no save long rit na rait. Long dispela mak, bikpela namba em ol meri.

Ol samting we i save stapim ol pikinini na ol arapela pipel long kisim gutpela edukesen o skul em ol wankain hevi, we i save stapim gutpela wok go het long bisnis na sosel developmen. Mani tu em i wanpela

hevi. Bikos pipel nogat inap mani, ol i painim hat long kamapim gutpela sindaun. Na tu nogat inap saveman. Ol meri i ken helpim ol man long kisim save na helpim long wok developmen. Tasol pipel i lukim ol meri olsem ol samting nating bilong karim pikinini na mekim haus wok tasol.

Edukesen i nidim gutpela luksave na helpim winim ol arapela wok long kamapim na go hetim ol wok developmen. Bikos wok bilong lainim ol nupela samting i nogat stap bilong em. Em i nidim ol lain i gat gutpela trening na save long mekim wok long go hetim edukesen. Em i nidim planti buk, ol samting bilong rait long en, ol sok na pensil samting na moa. Em i laikim ol klasrum, na planti moa.

Bilong givim ol dispela samting, ol kantri na papamama i mas mekim ol disisen wantaim bikpela tingting olsem pikinini i kisim skul. Em i bikpela samting moa long ol arapela samting.

Sapos ol gavman, ol kantri na pipel i putim strongpela tingting, ol ken painim mani long skul bilong ol pikinini bilong ol. Planti kantri i wok long tromoi bikpela mani long wok bilong difens fos. Olgeta yia, wol i tromoim moa long 700 bilien kina long difens fos. Sapos ol i ken putim hap mani long dispela i go long edukesen, ol saveman i bilip strong olsem olgeta pikinini bai gat gutpela skul, gutpela klasrum, na planti moa.

Long planti hap bilong Afrika, dispela samting i no kamap. Mani we gavman i katim na tromoi long edukesen i go daun na long ol ripot, helpim mani we ol ausait lain i givim long helpim ol yangpela kantri i wok long go daun.

Bihain long 1990, Wol Konprens bilong Edukesen long olgeta, ol kantri long wol i wokim strongpela komitmen long traime hat na putim olgeta pikinini long skul. Bikpela samting ol i putim tingting long en em long stended bilong skul. Long apim stended bilong skul, dispela i min olsem ol i mas kirapim moa skul, trenim moa tisa, na tu moa pikinini i mas go long skul.

Tisa em ol bikpela samting long ol pikinini i kisim gutpela save. Tasol i no tisa nating, nogat ol tisa i mas gat gutpela stended we i min ol i mas gat gutpela trening, redi na inetres long skulim ol pikinini.

Long sampela developmen kantri olsem India, Zimbabwe long Afrika na Kolombia long Saut Amerika, ol i kamapim sampela progrem long ol tisa i skruim trening na save bilong ol. Sampela rot em long "on the job training", we ol tisa i wok. Na long wankain taim skruim save, ol insevis kos na ol semina. Ol wokspes i save helpim tu ol tisa. Bikos em i givim sans long ol tisa i tilim save na tingting bilong ol.

Na tu taim ol tisa i kamap long klasrum, moa yet ol praimer skul, tisa i save lukim olsem planti ol kos i nogat gutpela mining moa long tisim ol pikinini. Bikos ol kos ya i no inap long helpim ol long laip na sindaun bilong ol.

Long Ghana long Afrika, ol i kamapim ol senis long mekim edukesen i fri na olgeta pikinini i mas skul. Dispela i wankain olsem long Papua Niugini.

Bihainim ol senis we edukesen sistem long Ghana i bihainim long apim stended bilong edukesen, ol i wok tu long lukim olsem ol pikinini i gat ples bilong sindaun, na gutpela klasrum long skul long en.

Ghana i kamapim nupela kurikulum we long en i gat ol tokples skul insait long tripela yia long praimer o komyuniti skul. Dispela nupela kos i adresim ol nupela salens olsem pasin we ol yangpela meri i no marit na karim pikinini, pasin long kisim marasin (drag) nogut.

Edukesen i no wanpela bikpela samting nating tasol, nogat. Em i namba wan tul bilong gavman i gat long yusim long lukautim ol pipel. Ripot bilong 1990 i soim olsem long 94 milien pikinini long ol yangpela kantri, husat i gat nem long skul i no go inap long Gret 5. Planti pikinini i wokabaut i go long klasrum wantaim amamas na bikpela tingting ol bai skruim save bilong ol, tasol nogat. Dispela i soim olsem mipela i feil. Sapos yumi painim strong, yumi ken kamapim ol skul we ol pikinini i go long en, sindaun amamas na skruim save bilong ol.

Painim Penpren



Nem: Linda Angli

Krismas: 17

Adres: Angoram High School, Private Mail Bag, Wewak, E.S.P.

Hobis: Stori, pilai, raun, harim kusik na senisim pesen.

Nem: Tina Kasuri

Krismas: 17

Adres: C/ Mission Leitre, PO Box 125, Vanimo, Sandaun Province.

Save Laikim: Pilai soka, volibal, basketbal na waswas long solwara.

Nem: Daniel Namhol

Adres: Kapiura Plantation, Kautu 2, PO Box 923, Kimbe-WNBP.

Save Laikim: Harim PNG Top 20s, raitim pas na senisim poto na presen, na painim gutpela isi meri long marit.

Nem: Samson Barasa

Adres: Buipabosijao LocalCopipative Company, PTY Ltd., PO Box 780, Kimbe-WNBP.

Save Laikim: Pilai soka, basketbal, harim musik bilong ol waitman na bilong Madang. Na tu mi laik maritim meri bilong narapela provins.

Nem: Freda Kapsine

Krismas: 19 (meri)

Adres: C/Mission Leitre, PO Box 125, Vanimo, Sandaun Province.

Save Laikim: Stori wantaim ol poroman na poromeri, go swim long wara n solwara, pilai soka na go painim pls.

Nem: Mek Eki

Krismas: 19 (man)

Adres: Kimb Pharmacy, PO Box 235, Kimbe-WNBP.

Save Laikim: Pilai gita, harim musik, lukim televisen na raitim pas.

Nem: Monica Dudu

Krismas: 18

Adres: C/Mission Leitre, PO Box 125, Vanimo, Sandaun Province.

Save Laikim: Go lotu, harim PNG Top 20s, kukim kaikai na pilai soka.

Nem: Daniel Namhoi

Adres: Kapiura Plantation, PO Box 923, Kimbe - WNBP.

Save Laikim: Raitim pas long ol meri, na painim gutpela meri long maritim. Mi painim meri husat save harim tok, n stap isi tasol long haus.

Nem: Helen Adu

Krismas: 16

Adres: C/Mission Leitre, PO Box 125, Vanimo, Sandaun Province.

Save Laikim: Pilai volibal, go long lotu na harim musik.

Tupela meri Afrika painim PNG penpren

**Dia Edita,**

Mitupela stail meri Ghana long Afrika i laikim sampela penpren long Papua Nigini. Mitupela i wet tasol long lukim sampela bekim, na hia em adres bilong mitupela wanwan:

Nem: Jane Aggrey

Krismas: 24

Adres: Box 117, Cape-Coast, Ghana.

Save Laikim: Danis, ol gutpela stail samting, marit na pilai kainkain spot.

Nem: Alberta Simpson

Krismas: 23

Adres: 1294, Cape-Coast, Ghana.

Save Laikim: Ritim buk, kukim kaikai, na painim man long marit.

- Bekim pas bilong tupela meri Ghana long Tok Inglis.

**TOKSAVE I KAM LONG EDITA:**

Sapos yupela laikim poto bilong yupela i kamap tu long dispela pes, plis putim wantaim gutpela klipela poto we pes bilong yu i stap klia. Ol pas wantaim trupela nem, adres, krismas na hobis tasol bai kamap long dispela pes.



# KANAGE



■ Kanage i bilong ples Wais long Is Sepik provins. Em skul long wanpela hai skul insait long Sepik Riva eria bilong Is Sepik provins. Wanpela wiken, Kanage ekting biksot na askim laik long wanpela skulmeri. Skulmeri orait na tupela mekim pekato pasin.

Long nait Kanage amamas na raun i stap. Man em so op stret. Kirap nogut, hetmasta singautim Kanage i go long opis long Mande moning na kwestenim em. Dewel bilong Kanage i ranawe long dispela taim, na olgeta amamas bilong em i pinis. Hetmasta i paiarim em wansait stret. Isi tasol em lusim opis bilong hetmasta na wokabaut i go daun. Long sem de yet, em karim olgeta kago tekov long ples.

**Manasa G. Kwatmba  
WAIS**

■ Kanage em wanpela mangi Buang insait long Morobe provins. Na boi i save pilai wantaim wanpela ragbi lig klab, em Buwana Bombers. Boi werim yunifom bilong em pinis, na tekov i go painim spia stik. Taim em tekov i go painim wantok bilong em long gren sten long smuk, referi blowim wisil long ol pilaia ron i go insait pinis long fil. Narapela pilaia i kisim fulbek posisen bilong Kanage.

Kanage go sindaun wantaim wanwok man bilong em long raithan, na long han sut em wanpela fatpela meri hailans i sindaun. Oi sindaun i stap na Kanage lukim ol beklain pilaia bilong Cowboys kisim bal na tekov i go klostu long trai lain bilong Bombers lng skoa. Kanage wok long bihainim muvmen bilong bal na ting olsem em stap insait long fil. Na laik takelim man. Tasol abus na em takelim fatpela meri hailans, husat i sindaun klostu long em.

Meri ya kisim Kanage i go long kot. Na Kanage tokim mejistret olsem: "Bos, mi ting mi sanap long beklain posisen. Olsem na mi takelim susa ya. Sapos susa i wari planti, em ken kam traim take-lim mi sapos em inap".

**KLS Nien  
LAE**

■ Kanage wantaim meri bilong em i bilong Watut long Galp propvins. Tupela go daun long Lae siti na go insait long wanpela stua. Meri laik baim wanpela trausis bilong ol meri. Em makim pinis na kisim wanpela trausis i go long kaunta. Na stuakipa i askim Kanage: "Hei! Wanem sais bilong meri bilong yu?" Kanage tokim stuakipa: Yu lukim sais bilong em pastaim. Em save kilim mi ya. Stuakipa harim olsem na kilim skin stret long lap. Man, meri bilong Kanage i sem pipia stret na ranawe i go ausait long stua. Taim Kanage go ausait, wanpela emti botol Coca Cola i givim gut-wan stret long het bilong em.

**Nobert Yamn  
BIALLA**

■ Kanage bilong ples Kuanambandu long Wosera, Is Sepik provins. Em save wok olsem wanpela kuskus long PNGBC Kimbe. Wanpela taim em go tromoi ai raun long taun na harim olsem Gilgilwang pawa ben bai kam pilai long Palm Lodge long Kimbe.

Em nau, baga nogut sisti go bek long haus, waswas, dres ap na wokabaut i go long danis. Em kamap na harim ol Gilgilwang i pairapim i stap. Kanage go bosan wanpela hap kona bilong tebol na dring i go inap em hap sens olgeta. Sem taim em harim Gilgilwang i singim 'Kuanambandu Wosera'.

Kanage sekim i go na painim wanpela Yauro sanap klostu long banis. Em tromoi tok pisim nau: "Aiyu lewa! Mi bagarap ya! I gat spes o?" Meri Yauro tanim na tokim Kanage: "Sore tru! Laswan tasol i stap ya em papa bilong yu i kisim pinis." Kanage i no harim gut na askim gen. Meri Yauro bikmaus nau long Kanage: "Mi tokim yu pinis! Las spes em papa bilong yu kisim pinis! Sapos yu bagarap, askim papa bilong yu pastaim!" Sem taim Kanage pilim han bilong wanpela bikipela man stret i tasim em long beksait. Em tanim na lukim lapun papa bilong em. Em bikmaus nau long papa bilong em: "Yupela tu ya, lapun na wip yet. Traim na givim spes long mipela ol yangpela!"

**Yuseki Saki  
BIALLA**

# Lapun man tanim olsem bebi na kaikai susu bilong susa



BIPO bipo tru long ples Kamung insait long Finsafen eria bilong Morobe provins, i gat tupela kum katim susa tasol i save stap long dispela ples. Nogat wanpela manmeri i save stap wantaim tupela.

Wanpela de tupela stap i go na pilim hangre nogut tru. Tupela nogat moa kaikai long haus. Olsem na tupela kirap bihainim wara Kamung na kilim planti kindam wantaim fis i go na kamap long het stret bilong dispela wara. Man basket bilong tupela i pulap stret long ol pis na kindam.

I no longtaim tupela i no kamap long wanpela raun wara. Tupela lukluk i go na lukim wanpela lapun man sindaun i stap. Taim lapun man i lukim tupela, kwikwan em kalap i go insait long dispela raun wara. Na tanim kamap olsem wanpela pis.

Tasol kwiktaim liklik susa i holimpasim dispela pis na givim long bikipela susa bilong em. Bikipela susa holim pis ya na putim long maus long brukim het bilong pis. Tasol popaia na pis i wel na go insait long maus na stap insait long bel.

Klostu long tuda na tupela go bek long haus. Long haus

tupela kukim ol pis ya wantaim kindam na mekim bikipela kaikai stret. Tupela yet mekim-save long kaikai i go na bel i tait olgeta, na tupela i slip.

Long moning, bikipela susa pilim olsem em i gat bel. Tupela stap i go sampela de bihain, na bikipela susa i karim wanpela bebi. Man tupela i amamas tru olsem tupela i gat wanpela bebi boi.

Orait wanpela de tupela karim bebi long bilum na tupela i go long gaden. Ol hangamapim bebi long han bilong diwai na go wok long gaden i stap. Taim tupela wok i stap, bebi bai kam ausait long bilim na tanim olsem lapun man em tupela bin lukim long raun wara. Na bihain singautim pig i kam, kilim na kaikai. Em kaikai pinis na bai go insait long bilim, tanim olsem bebi na slip i stap.

Na taim bebi i pekpek bai em krai. Na mama i kam long klinim pekpek na givim susa long bebi. Tasol mama lukim pekpek bilong bebi i olsem gras bilong pig.

Olgeta de wankain pasin i save kamap. Mekim na bikipela susa (mama bilong bebi) i tingting planti tru. Orait wanpela de, em tokim liklik susa. Na tupela hait na lukim bebi i kam ausait long bilum. Na kilim gen wanpela pig na kaikai. Bihain em go insait gen long bilum na tanim olsem bebi na slip i stap.

Man bel bilong tupela susa i bel kaskas olgeta. Bikipela susa i bikmaus nau: "Man dispela traipela lapun ya save giaman na kaikai susu bilong mi. Na mi save hatwok long klinim pekpek bilong em, we i olsem gras bilong mi."

Tupela go bek long ples na stap isi tasol. Wanpela de, tupela plenim olgeta samting pinis na wokim 10-pela bilum olgeta. Na stat long putim bebi i go insait long 10-pela bilum. Na kisim pikinini i go long haus na hanagamapim i stap.

Isi tupela ron i go ausait long haus n stat long bungim ol paiawut. Tupela bungim planti paiawut stret. Na stat long mekim paia. Man bikipela paia stret i kirap na kukim dispela masalai bebi insait long haus. Bebi pilim pen na krai wantaim i go na em i dai olgeta.

Bikos long dispela stori, tude ol manmeri bilong ples Kamung em ol manmeri bilong kaikai pig.

Stori i kam long:

**V. Zafirio  
LAE**

# Mi gat bikipela laik long marit, tasol papamama i no orait



pikinini bilong ol. Tasol mi lukim olsem em i save toktok gut long ol wanples mangi bilong em.

Sampela taim mi save gat strongpela tingting long kisim gelpren bilong mi i go long ples bilong mi yet. Na mitupela i ken stap gut na toktok long bihain taim bilong mitupela.

Mi tingting planti tumas long gelpren bilong mi na mi wari olsem nogut mi go longlong. Laiplain i gat sampela mejik o gutpela toktok long givim long ol man wantaim hevi olsem dispela o nogat?

### HELPIM MI

Dia Pren,

Yu tok pasin we yu tingting planti long gelpren bilong yu i givim hevi long yu. Laiplain i nogat mejik bilong givim long yu long daunim dispela kain hevi. Tasol mipela bai mekim sampela toktok we i ken helpim yu long glamis na skelim hevi. Mipela i no kirap nogut long sem pasin gelpren bilong yu i gat long yu. Mipela ting olsem ating i gat sampela as long dispela. Namba wan as em gelpren i mas yangpela moa long yu.

Narapela samting em gelpren i stap long liklik ples bilong em yet. Na em i sem bikos em i save olsem papamama, hauslain na ol wantok i wok long was gut tru long olgeta samting em i mekim long ples. Yu mas luksave long dispela tu. Bikos yu ting sapos yu kisim em i go long sampela hap longwe long ples bilong em, em bai lusim dispela sem pasin.

Namba tri samting em mipela i askim sapos meri ya i gat wankain laik olsem yu

laikim em. Yu luksave olsem yu gat bikipela laik tru long em. Na yu save tingim em. Tasol mipela save tu olsem yutupela i save rait long wanpela na narapela na autim laik bilong yutupela. Tasol mipela i no save sapos laik bilong em long yu i strongpela olsem yu laikim em o nogat.

Mipela i laik askim yu sapos yutupela i save toktok gut wantaim? Yu autim tu hevi em i gat long yu, olsem em i save sem long yu? Moabeta yu autim long ples klia dispela hevi long taim yu raitim pas long em.

Yu ting dispela hevi yu toktok long en wantaim papamama bilong gelpren, na yu i samting i kamap tru tru o yu no wok long klia tumas long ol? Na yu ting olsem dispela kain hevi i stap namel long yutupela? Yu tok papamama na ol hauslain bilong gelpren i save long prensip bilong yutupela, tasol ol i pilim olsem wanem long dispela prensip?

Yu tok yu rait pinis long papamama bilong meri na tokim ol olsem yu laikim pikinini bilong ol. Tasol papa bilong em i tromoi disepla pas. Dispela i soim olsem papa i no laikim yu pren wantaim pikinini bilong em.

Ating papa i no amamas bikos yu no askim em bipo yu prenim pikinini bilong em. Bikos long pasin kastom bilong Papua Niugini, ol papamama i save makim ol pikinini long marit. Ating em i laikim yu long go long em na toktok pastaim wantaim em. Tingim, traim dispela na lukim.

**MI LAIPLAIN**



Pasin bilong lotu i no tok pilai bilong Kanage

**Dia Edita**  
Mi laik spaotim pas bilong Peter Taul bilong Simbu i bin kamap long Wantok long 28-8-97. Pas ya i tok olsem: Planti ol brata na susa i putim tok pilai bilong Kanage i go long pasin bilong lotu. Brata em yu tok tru. Ol i rong long mekim dispela kain tok pilai. Yu husat i raitim ol dispela kain tok pilai, plis mi laik tok stret long yu long stapim dispela kain pasin.

Taim yu dai na yu go long God bai yu bekim wanem kain tok. Yu mas save pastaim na bihain yu ken bihainim Kanage long planti hap em i go long en. Em tasol na yu husat i laik sapotim o egensim mi rait i kam long Wantok bai mi ken lukim.

**Thomas Pati  
Eastern Border  
Mt Hagen**

Ol kopi Baiya long Hagen i no save baim kopi gut

**Dia Edita**  
Mi sapotim pas bilong Peter Mondol em i tok Kopi Baiya i no save baim Kopi gut long Hagen. Mipela planti i save lukim ol dispela boi save resis tru long pulim Kopi bilong ol manmeri long ka, taim ka i no stap yet. Ol boi save kalap long ka, ol savi pulim kopi bek bilong ol lain i kam long salim kopi i go daun. Ating ol manmeri save pikim kopi bilong ol long graun taim kopi i kapsait nabaut? Mi no save lukim dispela i kamap, bikos planti taim mi lukim olsem ol kopi baiya i save lusim ol kopi long graun na ol i save baim wanem kopi i stap long bek. Bihain taim ol lain ol i baim kopi long ol i go, ol kopi baiya i save baim gut ol kopi long graun na kisim i go bilong salim. Mi laikim ol plisman o ol sekyuriti long i mas raun long ples bilong baim kop, na kalabusim ol dispela boi i mekim kain pasin olsem. Em tasol na mi sapotim tok bilong Peter Mondol long gutpela tingting bilong em.

**John Kundi Pup  
Mt Hagen**

# VAT takis bai kilim liklik manmeri

**Dia Edita,**  
Mi laik sapotim namba tu hettok bilong *Wantok* niuspepa long las wik. Dispela stori i kam aninit long hettain olsem: "Liklik manmeri bai kisim taim long VAT takis".

Tru tumas, mipela ol liklik manmeri long dispela kantri i no save long wanem samting em VAT takis. Intenel Revenyu Komisen na nesanel gavman i no skulim mipela inap long dispela nupela kain takis, em gavman i bin tokaut long kamapim aninit long 1997 nesanel baset o mani plen.

Long stori mi ritim long dispela niuspepa, mi save nau olsem dispela takis i no gutpela.

Mi laik skruim tok olsem nau yet mipela ol pipel i kisim taim stret. Prais bilong olgeta samting i go antap pinis. Mekim na mipela ol liklik manmeri i kisim taim stret. Gavman i luksave long dispela tu o nogat?

Na nau wantaim dispela VAT takis, mi bilip mipela bai kisim moa mekimsave i kam long han bilong gavman. Long wanem, planti stua bai giman yusim dispela takis long apim prais bilong ol samting. Bikos nau yet gavman i slek long sekim ol stua long salim gutpela kaikai, na tu long prais bilong ol samting. Olsem na mi bilip gavman i no inap long sekim tu ol stua long

gimanim pipel, bikos long VAT takis.

Mipela ol pipel i no votim gavman long givim mekimsave long mipela, nogat. Gavman i bilong helpim ol pipel. Olsem na mi askim nau gavman bilong Praim Minista Bill Skate na namba tu bilong em, Chris Haiveta, long lukluk long dispela. Na noken tru larim dispela kain takis i kam insait long kantri.

Em tasol liklik tingting bilong mi. Mi bai amamas long ritim bekim bilong yupela ol arapela grasrut manmeri long dispela samting.

**John Samson  
LAE**

## Salim Ararua 2 na Painim Wok kaset long Hagen

**Dia Edita**  
Wari bilong mi olsem: Mi hatwok long painim ol kaset bilong Ararua 2 of Wewak na painim wok Apipi long ol stoa insait long Hagen siti. Tasol mi no lukim wanpela kaset bilong tupela i stap long ol stoa mi raun sekim. Yupela ol papa bilong stoa traim na salim ol dispela kain kaset. Noken salim ol wankain kaset tasol bikos planti bilong mipela i gat laik long planti ol arapela kaset. Em tasol na tenkyu tru long ritim na mekim dispela. Yu husat i sapotim mi, plis rait i kam long *Wantok* bai mi ritim.

**Thomase Pati  
Mt Hagen.**

## Wokim rot long Kaupena i go long Pangia

**Dia Edita**  
Mi wanpela mangi Pangia insait long Sauten Hailens provins husat i gat bikipela wari tru long ol pipol bilong Pangia. I gat klostu long 30,000 manmeri long Pagia husat save bungim bikipela hevi long taim bilong ileksen. Long taim bilong traibel, wantaim ol lain husat save slip klostu long haiwe bilong lalibu-Pangia dispela ol lain klostu long haiwe i save blokim ol pipol bilong Pangia long noken ron i go kam long dispela haiwe. Ol save rausim kago bilong ol liklik bisnisman bilong Pangia na mekim nogut tru long ol. Sampela taim ol i save sutim ol wantaim gan. Na ol pipol na wokman bilong Pangia husat i save wok long narapela provins i save kisim hatpela taim long go bek gen long wokples bilong ol. Long wokabaut i go bek long Pangia long Hagen, ol i save yusim bus rot long Molo i go kamap long Kaupena bihain long tupela de na kisim bas i go kamap long Hagen bilong go bek long wokples bilong ol long narapela provins.

As tingting bilong mi em i olsem, mi laik askim ol bikman bilong Pangia na lokol levul gavman bilong Sauten Hailens, wantaim tu nesanel gavman long lukluk long dispela hevi na mekim wanpela sot kat rot i go long Pangia i go kamap long Kaupena. Em tasol bikipela wari bilong mi.

**Philip Warea, Pangia**

## Givim moa wok long ol gret 10

**Dia Edita**  
Mi wanpela mangi long ples. Mi laik sapotim pas bilong brata Cletus Waiu long Wantok Niuspepa, de 04/09/97. Em i tok, givim wok plis, woda na ami long ol gret 10 mangi long ples.

Dispela em i tru bikos planti ol gret 10 i stap nating na wokim biket pasin, olsem stil, bagarip ol meri long pasin sem, kilim man na planti samting moa. Dispela i kamap bikos, taim mipela stap long skul, mipela i ting olsem bai mipela i kisim wok na bekim mani bilong ol papa mama na wantok husat i wok hat long baim skul fi bilong mipela. Tasol nogat wok na planti bilong mipela i no kisim wok. Olsem na mipela stap nating na belhat, na wokim biket pasin. Mipela i no wari tru long indai.

Olsem na mi sapotim brata Cletus, long gavman bilong yumi mas painim rot bilong helpim mipela ol lain i pinisim gret 10 stap nating long ples. Sapos gavman i gat gutpela tingting ating em bai kisim mipela long wok olsem plis, ami o woda. Em tasol wari bilong mipela ol skul livers.

**Yako Yoane, Mt Hagen**

## Lusim sin pasin, tanim bel na bihainim God

**Dia Edita**  
Mi wanpela mangi Morobe bilong ples. Mi laik sapotim tok bilong brata Ben Elias bilong Hagen. Em i tok olsem yumi mas lusim sin pasin, tanim bel na bihainim God.

Tru tumas yumi ogeta manmeri, pikinini bilong PNG yumi olgeta mas tanim bel. Planti man bilong PNG olsem kristen kantri, tasol yumi i no kamap long mak bilong kristen yet. Ol brata na susa yumi mas lusim pasin bilong jeles o tok kros na kilim nating man i dai, tok nogut long narapela narapela na pasin stil. Dispela ol pasin i no gutpela long ai bilong God. Sapos yu wanpela man o meri yu save ridim tok bilong God, orait yu ken pilim tru insait long bel bilong yu olsem bodi bilong yumi em i haus holi bilong God. Yumi olgeta manmeri bilong PNG mas tanim bel yet. Yumi mas laikim ol arapela olsem yumi laikim yumi yet. Na stap wanbel. Tok bilong God i tok yumi mas laikim arapela olsem yumi laikim yumi yet. Yumi mas bihainim tok bilong God. Tok i gat laip na tok i gat strong.

**Mana Yumeng  
Morobe**

## Ai bilong bilas o?

**Dia Edita**  
Mi laik sapotim pas bilong brata Tusa Vuvayase we i bin kamap long *Wantok* Niuspepa long mun Ogas 7, 1997. Mi laik bekim pas bilong Mista Kapul Kange tu, we i bin kamap long *Wantok* Niuspepa long Ogas 28, 1997.

Brata Kapul Kange i tok olsem ol sekyuriti i gat rait long sekim ol bilum bilong ol manmeri i kam aut long ol stoa.

Brata Kange, inap yu tok klia long mipela long wanem hap tru long mama lo bilong PNG i tok ol sekyuriti i gat rait long sekim bilum bilong ol manmeri? Bikipela antap i givim pinis yumi tupela ai long wokim wok stret. Ai i no bilong bilasim bodi. Olsem na yupela ol sekyuriti i mas yusim dispela tupela ai long lukluk na sekim ol manmeri. Sapo yupela i lukim olsem ol manmeri i haitim samting insait long bilum o bodi bilong ol, orait sekim dispela kain manmeri tasol. Noken sekim olgeta yet.



Na noken gimanim ol manmeri olsem ol sekyuriti i gat rait long sekim ol manmeri i kam aut long stoa. Sapos ol manmeri i tanim bek na kotim yu husat sekyuriti i wokim dispela kain, ol plis i ken arestim yu long brukim lo bilong holim bodi bilong man taim em i no givim tok orait long yu. Long wanem, dispela em rong pasin na i stap long mama lo bilong yumi.

Ol plisman tasol i gat rait aninit long mama lo long sekim ol manmeri we ol i lukim olsem ol i gat sampela samting long bodi bilong ol. Ol sekyuriti yet i no gat dispela rait olsem na Kapul Kange, yu noken gimanim mipela ol Hagen olsem ol sekyuriti i gat rait long sekim bilum na bodi bilong ol manmeri. Nogut yu go kalabus nating long wok

yu wantaim ol wanwok bilong yu i wokim i no stret.

Long pinisim pas bilong mi, mi laik sapotim Tuisa na tokim yu gen olsem; yusim tupela ai we bikipela antap i givim pinis na wokim wok stret. Ai i no bilong bilas. Tenkyu na God i ken blesim yu.

**Damo Tazik  
Mt Hagen**

## Bialla plis fos i slek tumas

**Dia Edita**  
Mi wanpela mangi Morobe tasol nau mi stap long Bialla, Wes Nu Briten provins. Mi laik autim wari bilong mi olsem. Ol plisman bilong Bialla save slek tumas long mekim wok. I gat ol planti trabel olsem hold-up long haiwe na ol stua long taun. Yupela ol plisman save stap we? Taim ol stilman i go pinis yupela i save kam soim pes tasol na tek-off. Mobeta, yupela mas holim ol stret long han, taim ol i wokim samting na maski long saspek nating na paitim ol man nating nating. Em tasol na yu husat man o meri i laik sapotim o egensim pas bilong mi, yu welkam tasol. Rait i go long *Wantok* niuspepa na mi ken ritim.

**Yuseki Saki  
Bialla, Mangi Wes**

## Opim musik studio long Lae

**Dia Edita**  
Mi wanpela mangi Morobe na mi laik autim wari bilong mi. Mi save harim kainkain pawa ben i save pairap. Na kainkain pilai i save kamap long PNG top 20's.

Mi save harim ol man save tok bilas long stesen bilong yumi long Morobe. Ol save tok Lae siti em bikipela siti tasol i nogat Pasifik studio o CHM. Dispela kain toktok em samting bilong sem ya. Mosbi i gat CHM na Madang ol i gat Tumbuna trek, na Rabaul em ol i gat Pasifik studio. Na olsem wanem long mipela ol Morobe? Mipela i gat laik long katim nupela kaset tasol mipela save painim hat tru long go long ol ples ol save

wokim kaset. Olsem na mipela save i stap bek.

Olsem na yupela memba insait long Morobe provins plis, inap yupela askim ol bisnis lain olsem Pasifik Gol studio, CHM o Tumbuna trek long kam na kirapim wanpela studio long provins bilong yumi yet. Ol narapela provins save tok bilas long yumi ol Morobe. Olsem nau yupela traim na lukluk long dispela. Mi sem pinis long harim dispela kainkain toktok. Yu husat laik engensim o sapotim, rait tasol i kam na bai mi ken lukim.

**Michael Wosako  
Morobe**





# Rausim lidasip traibunel

*Ol lida mas go long han bilong plis, wankain olsem ol pipel*

**Dia Edita,**  
Mi laik toktok long wanpela pasin em mi lukim i kamap bikpela long kantri bilong mipela, na i no stret tumas. Dispela em long ol lida olsem politisian i save mekim bikpela paul pasin. Na go sanap long ai bilong Lidasip Traibunel.  
Planti lida save risain na go fri. Mi lukim olsem dispela i no stret tumas.

Dispela i soim klia olsem ol liklik manmeri i gat lo bilong ol yet, na ol bikman meri o lida i gat lo bilong ol yet. Olsem na mi laikim dispela gavman bilong Bill Skate i ken glasim na rausim dispela lo na kamapim wankain lo bilong yumi olgeta.  
Sapos ol lida bilong yumi brukim lo orait putim ol long han bilong plis long sasim. Em bai ol i ken kot aninit long kriminel sas

olsem ol liklik manmeri. Nau yet em ol i save go fri na dispela i no stret.  
Em tasol liklik tingting bilong mi. Yu husat manmeri i gat wankain tingting olsem mi, plis salim long dispela niuspepa, na mi ken ritim.  
**Giangen Sopa VANIMO**

## Ol Bilbil mama soim gutpela piksa

**Dia Edita,**  
Mi bin ritim wanpela stori long Wantok niuspepa bilong Ogas 21, 1997. Dispela stori i bilong ol mama long ples Bilbil long Madang long i no wetim gavman. Ol yet i go pas long mekim wok long helpim kamapim gutpela sindaun na laip.  
Mi ritim dispela stori na amamas tru long ol mama. Mi laik tok olsem yupela ol dispela mama mama i mekim gutpela wok long strongim wok sios. Yumi olgeta i save olsem gavman i no gat baset bilong ol sios.

Sios i ron na sanap strong long bilip bilong ol Kristen manmeri. Yumi olgeta i save olsem gavman i no gat baset bilong ol sios. Sios i ron na sanap strong long bilip bilong ol Kristen manmeri. Yumi olgeta i save olsem gavman i no gat baset bilong ol sios. Sios i ron na sanap strong long bilip bilong ol Kristen manmeri. Yumi olgeta i save olsem gavman i no gat baset bilong ol sios.

Luteran sios long Papua Niugini em ol Papua Niugini manmeri yet i lukautim. I no moa ol waitma.

Planti ol nupela lotu ol i save tok beksait long Luteran olsem sios i dai nau. Tasol i no olsem Luteran sios em i sios bilong God.

Ol pasto bilong Luteran sios i save autim gutnius tasol. Dispela em i gutpelas. Mi tok bikpela amamas i go long ol mama bilong ples Bilbil long gutpela wok ol i wokim.

Yupela i no bungim moni long wokim bisnis, nogat. Yupela i hatwok long bungim moni long wokim haus holi bilong ANUTU God. Yupela i soim gutpela pasin tra.

**Mangi Finsafen MENDI**

## Ol meri noken kilim bebi

**Dia Edita,**  
Mi wanpela mangi hailens. Mi save gat laik long lukim o raitim (Glasim Lewa na Tingting wantaim Eddie Saunders), em i save kamap long dispela niuspepa long olgeta wik.  
Mi laik bekim wanpela tingting bilong Sandauns em i bin kamap long dispela niuspepa. Em i toktok long pasin bilong paul nabaut.  
Yes mi laik skruim toktok bilong Saunders long ol meri i save raun nabaut na i gat bel.  
Planti meri save karim pikinini pinis na tok nogat papa bilong pikinini, so kilim indai na tromoi long rabis.  
Mi bilip olsem olgeta pikinini ol meri i kilim ol bai kros long ol mama na papa bilong ol long heven wantaim papa God. Mi laik salensim olgeta meri na boipren bilong ol.

Yupela ol meri wantaim man i aigris, pasim tok gut na slip wantaim. Na pikinini kamap, yupela mas lukautim dispela laip God i givim yutupela.  
Bikos dispela pikinini i kamap long laik bilong yutupela wantaim long namba wan ples taim yutupelai sikirap.  
Insait long Papua Niugini tude, planti meri i save mekim dispela kain pasin nogut. Moabeta sapos yupela les long lukautim orait givim pikinini long sampela manmeri long lukautim.  
Laip bilong man em i bikpela samting tru. Papa God tasol i save holim laip bilong olgeta manmeri long dispela graun.

**Benjamin James TABUBIL**

## Taim bilong klinim Lae siti nau

**Dia Edita,**  
Mi lukim planti spet bilong buai i pulap long kona bilong ol stoa na bas stap long Lae siti. Mi i no wanbel long dispela kain pasin.  
Yumi mas lukautim taun bilong yumi olsem ol arapela siti na taun long Papua Niugini.  
Mi laikim nau yet yupela mas putim strongpela Morobe seketeri pos kwik. Seketeri tu mas mangi Morobe yet.  
Bikos ol ausait lain save kam pulap long taun bilong mipela na bagara-

pim olgeta. Olsem na em i taim nau long mipela ol Morobe yet i go pas long ol pablik sevis wok long provins. Yumi mekim olsem na ol ausait lain i ken i go ol nabaut long wanwan ples bilong ol.  
Yumi ken rausim ol pasindia tu i stap nabaut na mekim planti travel. Olsem na rausim ol dispela kain pipel i go bek long ples bilong ol.

**Michael Wosako LAE**

## Stapim ges paplain i go long Kwinslen

**Dia Edita,**  
Mi bin ritim wanpela stori long niuspepa we Mema bilong Gasel Open, Nakikus Konga, i bin toktok egensim pasin o tingting bilong gavman bilong mipela. Dispela em long salim ges bilong mipela i go long kwinslen, Ostrelia long paplain.  
Mista Konga i tok dispela i no gutpela. Bikos em bai kisim bisnis wok i go long narapela kantri, wantaim mani em PNG inap long kisim.  
Dispela em bikpela samting gavman bilong mipela i mas lukluk gut long en. Kamapim kain wok long PNG yet, bai mani i stap long kantri yet.

**John Wanpis KAVIENG**

## Rausim ol olupela wokman meri bilong Passam Nesenel Hai skol

**Dia Edita,**  
Mi wanpela mangi long Passam eria insait long Wewak, Is Sepi provins, em Passam Nesenel Hai skol i sindaun long en. Nau yet mi stap long Wutung long Vanimo, Sandaun provins.  
Mi laik autim wari bilong mi i go long ol bikman bilong edukesen insait long provins, na tu long Mosbi, long lukluk na rausim olgeta olupela wokman bilong Passam Nesenel Hai skol.  
Planti hevi save kamap long skol. Dispela em long wanem ol dispela olupela wokman i no save wok gut. Na kamapim hevi long skol.  
Mi ken tok tu olsem planti wokman long skol em ol lapun pinis. Tasol ol i wok yet long skol, na banisim spes bilong ol yangpela manmeri wantaim gutpela tingting na save.  
Olsem na plis ol bikman bilong edukesen, yupela mas lukluk gut na rausim olgeta olupela wokman meri long Passam Nesenel Hai skol.

**Wilson Glonthik Simbalip VANIMO**

# Goldie rot i bagarap olgeta

**Dia Edita,**  
Mi wanpela man husat i gat bikpela wari tru long rot i go long Goldie Bareks. I luk olsem longpela taim tru i nogat wanpela bikman i luksave long dispela rot.  
Mi save sori tru long lukim ol yangpela man bilong mipela long Laloki viles, husat ol i save traim hat tru long yusim ol hap bruk spet na savol long klinim graun bilong pulumapim hul long ol rot.  
Ating em i taim nau nupela gavman

i mas luksave long dispela rot.  
Long makim maus bilong ol pipel long Laloki na Goldie eria, mi laikim askim Nesenel Mema bilong mipela, Moi Avei, long helpim mipela na putim kolta long dispela rot.  
Tenkyu tru na mi amamas na putim yau tasol long husat man i laik bekim o sapatim pas bilong mi.  
**John J. Ngailas Laloki, DPI Stesin Nesenel Kapitel Distrik.**

## Ol Morobe tingim ples eria tu

**Dia Edita,**  
Mi wanpela mangi Menyamya insait long Morobe provins. Nau mi laik komplem i go long provinsal gavman bilong Morobe.  
Bikpela moni bilong Morobe provins ol gavman save brukim baset bilong Morobe pipel, dispela moni tupela save putim long wanem hap tru.  
Mi lukim Lae Siti long olgeta hap kona i bagarap tru. Olsem na mi laik askim yupela olgeta memba bilong Morobe long mas wok bung, na kamapim gutpela sindaun o klinin siti na ol distrik tu.  
Ol dispela rot bilong Menyamya nesenel haiwe tu tu i bagarap olgeta. Olsem na plis yupela olgeta memba bilong Morobe mas bungim wanpela tingting tasol na ronim gut siti bilong yumi na ol distrik tu.  
Olgeta taim yupela save lukluk tasol long taun. Na yupela i no save lukluk long asples bilong yupela.  
Yupela mas tingting gut. Ol papamama bin votim yupela long karim hevi long ples. I no long taun tasol. Bikpela belhevi bilong papamama, em rot, na kinkain developmen mas kamap long asples bilong yumi.  
Moni i no stap tasol long siti. Nogat, wok i stap long ples tasol yupela ol memba save pasim ai bilong yupela. Nau yupela mas lukluk na mekim samting gut.

**Michael Wosako LAE**

## Maski lukautim pig long taun eria

**Dia Edita,**  
Mi wanpela mangi Kimbe long Wes Nu Briten provins. Mi stap nau long Goroka, insait long Isten Hailans provins. Mi laik autim tingting bilong mi long Wantok niuspepa, bai olgeta manmeri long Papua Niugini i ken ritim na skelim.  
Mi save lukim ol manmeri i lukautim pig long Goroka taun eria, na laik askim we em i gutpela pasin o nogut? Mi laik askim olgeta manmeri long PNG long dispela.

Mi yet mi ting olsem em i no gutpela long lukautim pig long taun eria. Bikos pig em ol longlong abus na i ken bagarapim ol samting.  
Em i tru olsem pig em ol gutpela abus bilong mipela. Tasol mipela mas haitim ol.  
Mi askim nau ol bikman meri bilong taun atoriti long lukluk long dispela samting.  
Em tasol liklik tingting bilong mi.

**Robien Kondi GOROKA**

## Noken apim nem bilong Peter Barter nating

**Dia Edita,**  
Mi wanpela mangi Mimsie long wari Keram eria insait long Midel Ramu Distrik. Mi laik autim tingting na wari bilong mi i go long Wantok. Long Wantok niuspepa bilong Ogas 14, brata Mikasi Vizitaro i bin rait olsem olupela gavana bilong Madang, Peter Barter, i gat nem long mekim gutpela wok insait long Madang, na tu long Papua Niugini wantaim.  
Brata tok bilong yu i tru long sampela hap, tasol sampela i no tru. Long wanem wok bilong Barter i no bin helpim yumi olgeta distrik. Nogat. Em i bin wok long taun tasol na i no long sait bilong bus.  
Na tu gutpela long em i lus long 1997 ileksen. Bikos mipela gat planti arapela saveman meri i stap long ronim Madang. I no wanpela man o meri tasol i gat save.  
Wanpela belhevi bilong mipela ol pipel long Midel Ramu em taim em i bin baim liklik sip em i raitim olsem,

Ramu Ranger. Mi laik tok olsem dispela nem i bilasim nating ol pipel bilong Ramu Ranger eria. Bikos sip ya i no save bringim sevis i go long ol pipel long dispela eria. Nogat ya.  
Ating em baim bilong ol lain long Manam na Karkar Ailan. Yupela mas save olsem. Taun em i nogat planti populesen o pipel. Mipela long bus o rurel eria i gat planti pipel. Long dispela ileksen, sampela i guria olsem Jim Kas i bin kisim dispela sit bilong rijnal memba na nau em i kamap gavana.  
Mi laik tok olsem Kas i win bikos em i no bilong taun. Em i bilong bus ya. Na mipela ol bus pipel i givim namba long em. Luk olsem ol manmeri bilong bus i makim stret man bilong bus.  
**Roy Rogers Somnai Mimsie Viles Keram Riva MADANG**

## Stretim Vanimo paradais taun

**Dia Edita,**  
Mi i laik autim belhevi bilong mi i go long taun atoriti bilong Vanimo, Sandaun provins.  
Taun atoriti, ating yupela i slip gut tru ya. Na i no tingting long lukluk long taun i wok long kamap olsem ples bilong ol blakbokis na pig.  
Planti rabis bilong ol kain samting na spet buai wantaim emti botol na tin i pulap tru long taun ya.

Pastaim taun i laik klin liklik, tasol bihain em i senis. Ol pipia i pulap gen na ol sekyuriti wokman meri i ranawe nabaut.

Ples maket i bin klin tru. Na nau em i doti tru. Pipia i pulap long olgeta hap. Olsem wanem, yupela inap long klinim gen o nogat. Yumi tok Vanimo em i paradais. Tasol taun i pulap long pipia.  
Na yupela ol pablik traim na yusim het bilong yupela na toromoi ol pipia long pipia dram. Yumi i no ol kanaka. Yumi sanap pinis long lek bilong mipela yet long 21 kris-mas nau. Tasol luk olsem yumi wok long paul nabaut ya.


**Gaspar Piya Hiloxie VANIMO**





# CAMBRIDGE *Rugbi Lig* Nius


**STORI  
BILONG PILAIA**



**Posisen:** Seken rowa/fran rowa  
**D.O.B:** Ogas 2, 1975  
**Longpela:** 190cm Hevi: 100kg  
**Haitnem:** "Morgs"  
**Feveret tim taim mi mangi:** Wests  
**Biknem pilaia mi laikim taim mi mangi:** Wayne Pearce - kosa bilong Tigers.  
**Stori long wanem gutpela samting yu laik mekim taim yu pilai ragbi lig:** Winim gren fainol na win Tes gem bilong Australia.  
**Wanem samting yu save laikim tru:** Bet  
**Long wanem hap na ples em yu stat pilai ragbi lig:** Taim mi gat 5-pela krismas, mi pilai hapbek bilong St Patricks Guildford na Fairfield Patrician Brothers.  
**Wanem em bikpela samting tru long laip bilong yu long ragbi lig:** Taim mi pilai A gret long namba wan taim egens long Penrith long 1995  
**Feveret CD:** Diamond Life by Sade  
**Feveret Kaikai:** Mama i kukim kakaruk long oven (bekim)  
**Feveret sofdrink:** Apple jus  
**Feveret holide ples yu laikim:** Long Nu Saut Wels nambis  
**Wanem taim yu bin sem nogut tru:** Taim mi no holim gut ol bom na ol birua tim i skorim trai. Tim bilong mi i lus.  
**Wanem tim memba bilong i pani tru:** Chris Lawler  
**Yu laik bungim wanem man tru long wol:** Greg Norman  
**Wanem em ol gutpela samting long kamap olsem profesenel pilaia?** Plenti taim long go pilai go na tu kisim pe long wanem samting mi save wokim.

**Wanem samting i no gutpela?** I stap olsem pilaia tasol.  
**Husat ol 5-pela biknem manmeri bai yu laik go sindaun kaikai wantaim ol:** Greg Norman, Michael Jordon, Kwin, Papa na mama bilong mi.  
**Wanem samting yu bin mekim taim klap bilong yu i no ran gut long bigin long dispela yia:** Klap i stap gut tasol na olgeta pilaia i save long wanem wok bilong ol. Mipela save olsem ol samting bai senis.  
**I gat planti ol lain i kam na givim sampela tingting long stretim dispela hevi.** Ol pilaia i ting wanem: Mipela i save sapos mipela i stap strong yet, olgeta samting bai senis na olgeta pilaia bai hepi.  
**Yu senisim stail bilong yu long pilai insait long 12-pela mun olsem wanem:** Mi lainim sampela samting olsem rausim bal taim ol i takolim mi. Dean Pay na Brian Smith i helpim mi long planti ol nupela trik long pilai ragbi lig.  
**Wanem eria long pilai ragbi em yu laik bai yu mas strong long lainim:** Difens bilong mi i no gutpela  
**Wanem hap em yu laik go na raun sapos nogaut gem:** Long haus na golf kos  
**Wanem ol bilip em yu save mekim bipo long gem.** Mi save putim suks long lep lek na su  
**Yu save mekim wanem long stap longwe long futbol:** Go kaikai long ol kainkain haus kaikai na tu pilai golf.  
**Igat wanem video em yu laik lukim long eksesai bilong yu:** Looney Toons Vol III.

## Hasler tokaut long risain



• Des Hasler i mekim strongpela ron long wanpela gem.

DES HASLER i no ting planti man bai bilip long em. Tasol nau em i las taim em i pilai na em ritaia.  
 Bihain long wanpela ten faiv krismas long A gret futbol, Hasler i tok em i las taim em i pilai. Em i bin mekim tupela promis tu olsem bipo tasol em i popaia ya.  
 Nau em i gat 36 krismas, Hasler i tokim Sif eksekutiv opisa bilong Wests Ragbi Lig klap olsem em las gem. Na dispela i stapim Wests long sainim em gen long wanpela yia moa.  
 "Ol i gat laik long mi stap yet tasol mi yet i laik pinis pilai," Hasler i tok.  
 Planti man bai sutim tok olsem em i tok em i rasin na go long Inglan. Na tu bihain em i tok em

bai risain. Las yia tu wankain tok i bin kamap, tasol nau olgeta tok tok i tu olsem mi bai pinis pilai.  
 Hasler i nap ritaia bihain long em i helpim Manly long winim ARL taitel las yia. Tasol ol Wests i askim em long pilai. Wankain tu i bin kamap long 1993, we em i bin go na pilai wantaim Hull klap long Inglan. Dispela klap i bin kisim Marcus Bai long las yia.  
 Em i bin kambek long Australia na pilai tupela yia. Las yia em i stap olsem memba bilong Manly tim husat i winim ARL taitel.  
 Dispela yia kosa bilong Wests Tommy Raudonikis i save yusim em olsem utiliti pilaia. Hasler i save pilai long tripela posisen long hapbek, huka na lok fowat.

Em i kamap olsem namba foa pilaia wantaim 287 gem. Arapela ol pilaia em Terry Lam, Geoff Gerard na wan pilaia bilong em Paul Langmack. Em i winim tupela gren fainol long 1987 na 1996, na pilai 12 Tes bilong Austral na 13 NSW Orijin gem.  
 Des i givim planti helpim long klap. Mipela laik pasim em tasol em yet i tok em les nau long pilaia, Bullock i tok.  
 Em i bin bringim gutpela rot bilong difens i kam long kalp. Na mi bilip dispela kain stail i opim ai bilong planti ol pilaia long klap. Em i gat 36 krismas tasol em i wok long pilai yet long strongpela kompetitisen.



# CAMBRIDGE



GOVERNMENT WARNING: SMOKING IS DANGEROUS TO HEALTH.





# CAMBRIDGE *Rugbi Lig Nius*

## Pirates aut MCL taitel

PIRATES i autim tiket bilong Tent Siti Rangers 7-4 long winim taitel bilong Morobe Kantri Ragbi Lig las wik Sande.

Insait long B gret, Kamkumung Jets i flai antap na abrusim ol Tent City Rangers 16-12.

Trena bilong Pirates Wama Dua i mekim bikpela tok amamas i go long ol pilaia bilong em.

"Mipela i no biknem tim. Tasol mipela i bin pilai gut tru na autim stret ol arapela strongpela tim.

"Mi laik mekim bikpela tok amamas i go long ol sapota long Baundri Rot. Ol dispela lain sapota i bin stap wantaim na sapotim mipela long taim nogut na gutpela taim wantaim.

Pirates i win taim em i kikim tripela penalti gol na wanpela fil gol long kisim 7 poin na Tent Siti Rangers i kisim tupela penalti gol tasol.

Rangers i brukim kiau taim taim olpela pilaia bilong Pot Mosbi Vipers Fisa Masayang i kikim penalti.

Taim Masayang i kikim dispela konversen, pawa bilong Rangers i kamap strong tru. Ol fowat olsem Benjamin Gabi, Douglas Mone, Clement Hølemba na Ronnie Willie i wok long pilai strong long brukim difens bilong Pirates.

Taim pilai i wok long kamap strong, referi Clement Watson i givim penalti long Rangers na Pirates i bekim skoa. Skoa bilong tupela tim wantaim nau i sanap long 2-2.

Ol fowat bilong Pirates Jinive Wai, Jeffrey Mul na huka Waks Wagani i traim long brukim difens bilong Rangers.

Rangers i kisim namba tu penalti. Na faiv-et Peter i bin kisim dispela skoa. Rangers nau i go pas long skoa 4-2. Klostu long hap taim, Masayang i bekim na skoa i sanap long 4-4.

Sampela sekens i stap yet, na Jinive Wai i kisim wanpela fil gol na skoa i sanap olsem Pirates em 5 na Rangers i sanap yet long 4.

Insait long namba tu hap, pilai i wok long strong tru na skoa i no bin kamap. Pirates i kisim wanpela penalti na kikim penalti long winim Morobe Kantri Ragbi Lig taitel long 7-pela poin.

Rejinol mensea bilong Rothmans na Eria menesa Gillam Mathew i givim ol prais na Mutrus tropi i go long ol wina.



• Ol pilaia bilong Tigers i kurakum long fowat blong Tarangau Waine Maule long mesa semi fainel long Port Mosbi Ragbi Lig kompetisen. Tarangau nekimTigers 16-8

## Tupela Vipers winim gren fainel long Australia

TUPELA biknem pilaia bilong Pot Mosbi Vipers i wok long kamapim nem long Gemfield Giants Ragbi Lig klap long Sentral Hailans kompetisen long Brisben Kantri.

Tupela pilaia ya em David Mune and Karo Mabua.

Mune na Mabua i bin helpim Gemfield Giants long winim namba wan primiasip taitel taim ol i

autim Middlemount Panthers 24-10 long gren fainol las wik.

Dispela em i namba wantaim Gemfield i winim gren fainol taim ol i statim klap long 1990.

Presiden bilong Gemfeild Giants Charlie Hawkins i mekim bikpela tok amamas i go long tupela pilaia ya.

Em i tok Mabua i bin pilai wantaim klap bilong en long 1995. Na em i namba tu taim nau em i pilai gen.

Long 1995, Gemfeild i no laki tumas. Ol i no pilai gut. Tasol long dispela yia, Mune na Mabua i helpim tru klap bilong tupela na ol i win.

Mabua i pilai fulbek na Mune em i pilai senta.

Hawkins i tok em i guria stret long lukim Mune i pilai na takolim ol bikpela birua bilong em.

Sais bilong Mune i liklik tasol taim em i sanap na ran long fil, em i kamapim tru nem bilong em olsem ainman ya.

Insait long semi fainol las wik egens long Bluff, Giants i wilwilim ol 58-26. Dispela taim Mune i kisim liklik bagarap.

Long gren fainol las wik, Mune i no pilai fultaim bikos em i kisim bagarap ya.

Tasol difens bilong em i mekim bikpela tenis tru long tim.

Tupela wik i go, Giant i daunim Tigers 38-18. Dispela em ol bikpela semi fainol we Mune na Mabua i bin pilai strong tru.

Kompetisen bilong Sentral Hailens long Brisbane i gat 9-pela A gret tim an 11-pela A riserv.

Dispela kompetisen tasol em ol selekta i save makim Central Queensland.

# Tarangau nekim Tigers

TARANGAU i bukim namba wan spes bilong gren fainol taim ol i autim Kone Tigers 16-8 long mesa semi fainol bilong Pot Mosbi Ragbi Lig. Dispela pilai i bin kamap long Lloyd Robson oval long Bisini.

Arapela bikpela A gret gem i no bin kamap. Paga i no bin kamap na Difens i win long fofit.

Tarangau nau bai wetim wina bilong Difens, Royals na Magani. Sapos wanem tim i win, em bai bungim Tarangau.

Ol boi Woda i kisim taim. Las wik, Tarangau i luk daun long Magani, na Magani i tanim bek na nekim ol 26-16. Dispela i kirapim bel stret bilong Tarangau long las wik Sande.

Kone Tigers i rausim trausim bilong ol boi Hanubada 19-18, na ol i go bungim Tarangau. Tasol ol boi long Bomana i no pilai kaskas long ol, ol wipim ol stret ya.

Gem namel long Kone Tigers na Tarangau i bin kamap gut tru. Tasol

long pinis bilong em, i gat liklik trabel we ol sapota bilong Tigers i go insait long fil na statim pait wantaim ol pilaia bilong Tarangau.

Ol plisman na ol sekyuriti i bin go hariap tru na stapim dispela pait. Sapos nogat, bikpela trabel tru ating bai kamap ya.

Kone Tigers i brukim kiau taim referi Paul Gul i givim penalti long ol. Gul i wokim disisen olsem ol pilaia bilong Tarangau i opsait. Kepten Stanely Haru i no popaia, em i kikim gut tru na ol i kisim tu poin.

Samting olsem 15 minit nau, Tigers i kisim arapela penalti na skoa bilong ol i sanap long 4 na Tarangau i no skoa. Namba tu poin bilong Kone Tigers i kamap taim ol pilaia bilong Tarangau i mekim hai takol long pilaia bilong Tigers.

Namel long namba wan hap bilong pilai, beklain bilong Tarangau i paia. Gideon Siringin i putim namba wan trai. Dispela

traim i bin kamap long gutpela pilai bilong fowat na beklain.

Hapbek Dickson Sibia i kikim konversen na skoa bilong Tarangau i go antap long 6 poin na Tigers i stap yet long 4 poin.

Ino longtaim bihain long dispela trai, Mek Gele i putim namba tu trai bilong Tarangau. Kepten bilong em James Naipao i brukim difens bilong Tigers na setim dispela trai. Dispela trai hapim skoa bilong Tarangau i go long 10 na Tigers i stap yet long 4.

Insait long namba tu hap, Tarangau i kirapim stret das. Ol bikpela fowat bilong ol olsem Naipao, Billy Kambao, Greg Teine, Waine Maule na Simon Kitingi i statim stret paia.

Tripela fowat ya Mauwe, Naipao na Kambao i save brukim stret difens taim ol i holim bal. Dispela i givim hat taim tru long ol fowat bilong Tigers.

Ol fowat bilong Tigers olsem Milton Mayo, Tino Hombi, Peter Akisave na Moses Dino tu i wok long bekim dinau bilong ol fowat bilong Tarangau. Tasol ol i sotwin na Tarangau i mekim save long ol.

Tarangau i wok long kamapim gutpela gem stret. Ol i bihainim gem plen na dispela i givim hat taim tru long Tigers.

Siringin i putim namba tu traim bilong em na dispela i bringim skoa i go antap long 14-4. Kone Tigers i laki tru long senta Brian Gul i katim wanpela pas na kisim bal na siksti i go putim trai long wokim skoa bilong Tigers i luk gutpela 14-8.

Tarangau i no giv ap. Ol i pilai strong i go na Brian Oreke i kisim wanpela penalti long hapim skoa i go long 16-8. Kone Tigers i traim hat tru tasol taim i ran aut na Tarangau i win.

Tarangau i sterfbai long gren painol. Ol bai wetim wina bilong Difens, Royals na Magani.




# CAMBRIDGE

GOVERNMENT WARNING: SMOKING IS DANGEROUS TO HEALTH.







• Oi kwinn bilong Kiunga volibal kompetisen, Malterns.



• Pot Mosbi Telikom i lus long gren fainol long Bara 1 - 0.



• Joyce Siniu bilong TST Stars i putim was long pilaia bilong Sobou. Sobou win 1 - 0.



• Tau Hasu bilong West i sanap strong long takol bilong Difens. Em i strong na West i win 16 - 10.



• Difenda bilong Sobou, Teckla Barampi traim strong tru long kisim bal long pilaia bilong Stars, Mary Jimang.



• Oi boi Safasafa long Kaiapit i traim lak tasol long nesanel klap soka sempionsip long Madang. Oi i no laki tumas, olsem na traim gen neks yia.



## Goroka Telikom meri opim ai bilong ol bikman long sempionsip

MARGARET MUNJIN i raitim

TELIKOM wimens soka klap bilong Goroka long Isten Hailens i opim tru ai bilong ol opisal na bikman bilong PNGFA long stap insait long mesa semi fainol egens long susa tim bilong ol, Telikom bilong Mosbi.

Tupela tim ya i bung long nesanel soka klap sempionsip long Divine Wot Yunivesiti soka fil.

Telikom Mosbi i gat biknem. Ol i gat 7-pela intanesenel pilaia i stap long tim bilong ol, tasol dispela i no stapim ol meri Goroka long pilai wantaim ol. Ol meri long kol peles Goroka ya i kaikai tit na brukim bun stret wantaim ol meri long siti ya.

Telikom Goroka i bin pilai strong tru long

namba tu hap long dro wantaim Morobe Yunaited long namba wan gem. Na long Sarere gen, ol tu i dro wantaim namba tu tim bilong Lae, Blu Kumuls. Na dispela i helpim ol long surik i go long fainol long bungim Telikom Mosbi.

Ol i pilai strong tasol ol i lus long ol meri Mosbi 3-1.

Anna Dengkeo, straika bilong Goroka i pilai strong tru long helpim tim bilong em long go insait long fainol. Em i traim long sutim ol gol long olgeta kona bilong soka fil tasol beklain bilong Telikom Mosbi i strong tru.

Ol biknem bilong Telikom ya em Phoebe Rarabun, Nellie Taman na Christine Holland i putim strong difens long Telikom Goroka. Ol gol bilong Mosbi i kam yet long stail meri ya Nellie Taman.



• Kwin bilong wimens soka, Bara bilong Lae.  
Photo: Watson Gabana.

## Ol Mosbi pilaia winim Pilaia ov Tonamen awod

TUPELA straika bilong Mosbi, Kila Kila bilong Babaka na Nellie Taman bilong Telikom i winim Pilaia ov Tonamen.

Kila na Taman i winim tru ol arapela pilaia bikos long gutpela pilai bilong ol sem straika. Kila i win bikos long ol kik o straik bilong em long golkipa na Taman i win bikos em i luk olsem man na pilai bilong em i winim tru olgeta arapela pilaia long tonamen.

Las yia em i kisim awot bilong skorim planti gol long Lae.

Ol arapela lain i kisim awot tu em Wanting Yagum bilong Telikom Lae, (Nambawan difenda) long ol meri, Issac Mather bilong Madang Newtaun long ol man.

Teachcomm bilong Wabag na Oksie klap long Tabubil i winim Fair Play awot na K200.

Ol top tim insait long man divisen em: Mosbi Yunivesiti, Mosbi Babaka, Lahi Sobou na Madang Newtown. Insait long meri divisen: LFA Bara, Mosbi Telikom, Goroka Telikom, na Lahi Morobe Yunaited.

Ol tim husat i no kisim prais long fainol i kisim soka bal i kam long Puma kampani.

Presiden bilong Soka Peter Mommers i tok Puma i givim 50 soka bal. Nau PNGFA i pasim tok pinis olsem nek sempionsip, ol bai yusim tasol ol Puma soka bal ya.

## Wewak i kirapim gen junia soka

WATSON GABANA i raitim

WEWAK i gat nem long yut soka. Nau yet ol i laik kirapim Pikinini Soka, na dispela em soka resis bilong ol komyuniti skul insait long Wewak taun yet.

Namba tu president bilong Wewak Soka Asosiesen David Bandi i go pas long dispela tonamen.

Em i tok Wewak bai holim Anda 14 tonamen long traim strongim na kamapim strong stendad bilong soka insait long provins.

Bandi i tok Emmanuel Treding bai sponsa long dispela kik resis bilong on yut.

Em i singaut i go long ol komyuniti skul insait long taun long givim nem kwik long en so em i ken stretim ol program ya. Dispela soka tonamen i bin kamap las yia, na i bin ran gut tru ya.

Dispela Pikinini Soka em wanpela program bilong Spot Opis bilong Wewak.

Bani i tok 7-pela skul i bin givim nem pinis long stap long tonamen. Ol skul ya em Mongniol, Kaindi, Kreer, Mani, Perigo na St Mary.


Wanwan skul bi putim tupela Anda 14, Anda 12 na Anda 10. Mani tasol bai putim Anda 14 na Anda 12 soka tim.

Wewak em wanpela strongpela tim long bipo. Taim Anda 10 soka taitel, Wewak, Madang, na Mosbi i save holim taitel ya. Tasol nau dispela Anda 10 tonamen i pinis, ol arapela senta olsem Mosbi tasol i strong yet long junia soka bikos ol i gat gutpela menesmen bilong Pot Mosbi Skulbois soka.



# National Heart Foundation of Papua New Guinea Inc.

## LUKAUTIM LEWA BILONG YU KAIKAI GUTPELA KAIKAI



- Ol kaikai i gat wel o gris, bata, suga na sol em noken kaikai planti. Na tu noken dring planti bia na ol arapela strongpela dring.
- Kaikai inap mit tasol olsem kakaruk, ol kaikai i nogat planti gris o bata, lo fat milk o susu, nat na ol kiau.
- Kaikai planti prut, ol vegetebels olsem kumu gras na ol gaden kaikai, bred, rais, pasta na ol bin. Na tu yu mas dring planti wara long olgeta de. Bikos wara i gutpela long lukautim bodi.

**TOK NOGAT LONG:** • Ol kaikai em yupela save fraim wantaim gris o wel, na tu long ol kaikai i gat gris

- Lem fleps
- Sips
- Krim bans na ol arapela swit kaikai
- Planti sol o ol kaikai i gat planti sol

**TOK YES LONG:**

- Ol gutpela nupela prut
- Gaden kaikai olsem kumu gras
- Rais, pasta na siril
- Wolgrein bred
- Pis
- Mit na kakaruk

***Yu bai gat gutpela helti bodi we yu no inap  
go fat na lewa bilong yu bai tenkim yu***

NATIONAL HEART FOUNDATION OF PAPUA NEW GUINEA INC.  
P.O. Box 158, Mount Hagen, W.H.P. Phone: 542 2199 Fax: 542 2384



**PMSA Soccer Ladder**

Premier	P	W	D	L	F	A	PTS
1. Guria	21	15	3	3	35	17	48
2. Uni	21	13	7	1	42	13	46
3. Defence	21	14	3	4	33	18	45
4. Babaka	21	12	6	3	35	27	42
5. Rapatona	21	9	6	6	26	20	33
6. Tarangau	21	8	3	11	26	36	27
7. Blue Kumuls	21	6	4	11	26	26	22
8. K/Andra	21	5	5	9	21	32	20
9. Hoods	21	5	4	11	22	27	19
10. Momase	21	4	5	11	24	28	14
11. Ela Utd	21	3	4	12	17	32	13
12. Sobou	21	2	3	16	20	26	9

First	P	W	D	L	F	A	PTS
1. Adau	24	15	5	4	39	18	50
2. P.S.Rutz	23	15	3	5	35	15	48
3. Eastenders	24	14	4	6	35	20	46
4. Simla	23	11	8	4	36	17	42
5. Pom Utd	23	9	7	7	38	27	34
6. Keweh	23	9	4	10	31	21	31
7. Wanzesi	23	8	3	13	28	33	30
8. G.F.C	23	8	8	7	33	29	29
9. Normads	23	7	7	9	19	24	28
10. Buresong	24	7	5	12	22	38	24
11. Bommers	23	6	6	11	29	38	24
12. Kings	22	4	6	12	13	30	18
13. Tawala	22	3	4	15	11	38	13

R.P.I	P	W	D	L	F	A	PTS
1. Guria	15	9	4	4	20	14	29
2. Kurti-Andra	15	7	4	4	25	10	25
3. ICF Uni	14	7	3	4	27	12	24
4. Blue Kumuls	15	6	5	4	19	16	23
5. Sobou	14	5	6	3	13	7	21
6. Ilimo Bommers	15	3	4	8	11	18	13
7. Normads	15	2	2	11	9	20	8
8. C.T.Kings	15	1	1	13	5	24	4

R.P.2	P	W	D	L	F	A	PTS
1. F.B.H Defence	15	10	4	1	22	6	34
2. Babaka	15	7	5	3	27	12	26
3. Keweh	14	8	1	5	20	21	25
4. Tarangau	14	8	0	6	11	11	24
5. Rapatona	12	6	3	3	15	9	21
6. Momase	13	5	3	5	18	12	18
7. ICPNG Togelu	12	4	3	7	9	11	15
8. Wata United	15	3	4	8	9	17	13

Second	P	W	D	L	F	A	PTS
1. Nisco	17	13	3	1	32	4	42
2. ICPNG Togelu	8	11	5	2	20	8	38
3. Bilawawa	17	9	6	2	19	9	23
4. M. Gaindu	17	10	3	4	22	14	33
5. Cyclone	17	8	7	2	22	10	31
6. Wata Utd	18	8	4	6	24	14	28
7. Kenmore	17	5	2	10	9	21	16
8. Chauka	17	4	3	9	10	21	15
9. Toring	16	3	3	10	8	16	12
10. Fairdeal	18	1	1	16	5	24	4


Under 19	P	W	D	L	F	A	PTS
1. Sobou	22	13	5	4	34	19	44
2. Guria	22	12	6	4	32	14	42
3. ICF Uni	22	11	7	4	29	15	41
4. Kurti-Andra	22	10	7	5	31	19	37
5. Tarangau	22	7	9	6	14	13	30
6. Momase	22	8	4	10	27	25	28
7. F.B.H Defence	22	5	9	8	15	22	24
8. Pom Utd	22	5	7	10	12	18	22
9. Rapatona	22	5	6	11	15	14	21
10. Hoods	22	5	5	12	16	30	20
11. Blue Kumuls	22	2	6	12	5	22	12

Women 1	P	W	D	L	F	A	PTS
1. Telikom	17	12	3	2	34	4	39
2. Uni	17	10	5	2	27	13	36
3. T.S.T stars	17	9	4	4	25	9	31
4. Normads	17	8	4	5	16	11	28
5. Sobou	17	6	6	5	14	15	24
6. Tarangau	17	5	7	5	11	13	22
7. Wanzesi	17	3	7	7	7	14	16
8. Guria	17	3	6	8	12	20	15
9. Defence	17	3	4	10	4	20	13
10. Bommers	17	1	4	12	5	34	7

Women 2	P	W	D	L	F	A	PTS
1. Namiu	21	13	6	2	29	6	45
2. Bomana	21	13	6	2	25	13	45
3. P. S. Rut:	22	12	6	4	36	12	42
4. Kings	20	12	5	3	28	8	41
5. G.F.C	20	12	5	3	19	4	38
6. Cyclone	20	12	1	7	28	13	37
7. Pom Utd	22	9	7	8	13	15	34
8. Blue Kumuls	20	6	6	9	22	22	25
9. Morata Utd	20	5	2	13	14	24	17
10. Tawala	20	3	8	9	3	14	17
11. Keweh	21	3	4	13	9	27	13

**N.B**

1. Ela United has been suspended.  
 2. Top 5 teams in each division will qualify to Play in the finals  
 3. Jimmy Kori from P.S.Rutz has been suspended and will appear before the disciplinary committee meeting to be held on Monday 15 at the S.J.G stadium time: 5.30pm.  
 4. All club managements are kindly asked to check their players properly before they take the field. Any Drunkard person should not be allowed to take the field.  
 5. Referee's have been urged to shorten your playing time if you do not take the field quickly. Many people find it hard to go home because games normally finishes.  
 6. If you any complaints in regards to the current progressive points table, please see Mr. Yui now so that necessary corrections can be made.



• Soka eksen namel long ol Sobou and TST stars. Sobou i bin winim ol Stars 1-0.

**PMSA Soccer draw Bisini One**

Time	Divisons	Fixture
8.30	R.P.Z (4 V 5)	Babaka vs Rapatona
10.00	Second (4 V 5)	M.Gaindu vs Cyclone
11.30	Women Two (4 V 5)	GFC vs PS.Rutz/Cyclone
1.30	R.P.I (4 V 5)	I.C.F Uni vs Sobou
3.00	First (4 V 5)	Simla vs Pom Utd

Time	Divisons	Fixture
8.30	R.P.2 (2 V 3)	Keweh vs Tarangau
10.00	Second (2 V 3)	ICPNG Togelu v Bilawawa
11.30	Women Two (2 v 3)	Naniu vs C.T.Kings
1.30	R.P.I (2 V 3)	Kurti-Andra vs Blue Kumuls
3.00	U19 (4 v 5)	Kurti-Andra vs Tarangau

\*Knock out no one for law divisions  
 \*Gate fees: K2.00 per person

**\*League Champions: 1997**

Under 19: Sobou  
 R.P.2: F.B.H. Defence  
 R.P.I: Guria  
 Womens 1: Not yet  
 Womens 2: Bomana B.Kumuls  
 First: PS Rutz

**Sunday: 21 September 1997**

First knockout and catch up games  
 For the premier divisions and W.I.

Time	Divisons	Fixture
8.00	Women one (4 v 5)	Normads vs Sobou
9.45	First (2 v 3)	Adau vs Shell Eastenders
11.30	Premier	Rapatona vs Pepsi Momase
1.30		ICF Uni vs Babaka

Time	Divisons	Fixture
8.00	Under 19 (2 v3)	Guria vs ICF uni
9.30	Women 1	Telekom vs ICF. Uni
11.00	Premier	Taranagau vs Sobou
12.45	Premier	K/Andra vs Hoods
3.30	Premier	Guria vs F.B.H Defence

**Note:** All Gate fees are now K2.00 per person including players as well.

**ARL & Super League Finals Draw**

**ARI Semi-Finals**

Saturday 20 September (Sydney Football Stadium)  
 Newcastle vs North Sydney (First grade)  
 Parramatta vs St George (Reserve grade)  
 South Sydney vs Sydney City (under 20)

\*Losers eliminated, winners advance to grand final

**Super Grand Finals**

Saturday 20 September (ANZ Stadium)  
 Brisbane vs Cronulla (First Grade)  
 Canterbury vs Auckland (Reserve Grade)

**ARL Semi-Finals**

Sunday 21 September (Sydney Football Stadium)  
 Manly vs Sydney City (First grade)  
 Balmain vs South Queensland (Res Grade)  
 Balmain vs Parramatta (Under 20)

\*Losers eliminated, winners advance to grand final.

**Lahi Soccer Association Week 25 Draw**

Sik stadium	Day	Time	Div	Fixtures
Sat	8.00	U19		Morobe Utd v Telekom
20/9	9.15	W1		Asiawe v Guria
	10.30	W1		Morobe United v Elcom
	12.00	First		Northwest v Sundaries
	2.00	P1		Sobou v Sikambu
	4.00	P1		Morobe Utd v Uniteck
	8.00	U19-1		Elcom v Sobou
	9.15	W1		Waliya v Rapatona
	10.30	W2		Northwest v Eastern

Star	Day	Time	Div	Fixtures
	12.00	P1		Elcom v Guria
	2.00	P1		Asiawe v Sikambu
	4.00	P1		Rapatona v Telekom

UNI 1	Day	Time	Div	Fixtures
Sat	11.00	U19-1		Sundries v Unitech
	12.15	W1		Sobou v Sundries
	1.30	P2		Sobou v Elcom
20/9	2.45	P2		Telecom v Rapatona
	4.00	P2		Asiawe v Sikambu

21/9	Day	Time	Div	Fixtures
	11.00	W1		Elcom v Guria
	12.15	P2		Morobe Utd v Unitech
	1.30	P2		Sobou v Sikambu
	2.45	D2		Suten Blues v Kuac
	4.00	D2		Eastern Star v Kalam Utd

Uni 2	Day	Time	Div	Fixtures
Sat	11.00	U19-2		Defence v Sikambu
	12.30	D2		Mungkas v Kurti Andra
	14.00	D1		Lae Biscuit v Milne Bay

Utd	Day	Time	Div	Fixtures
	16.00	D1		Muna v Gee Otton
21/9	11.00	D2		Dal Labu v Mungkas
	12.45	U19-2		Gee Otton v Eastern

Star	Day	Time	Div	Fixtures
	1.00	U19-2		Guria v Lae Biscuit
	4.00	D1		Mungkas v Defence

Uni 3	Day	Time	Div	Fixtures
Sat	11.00	U19-2		Sobou v Milne Bay

Utd	Day	Time	Div	Fixtures
	12.15	U19-1		Elcom v Asiawe
21/9	11.00	U19-1		Unitek v Milne Bay

Utd	Day	Time	Div	Fixtures
	12.15	U19-1		Sunstriders v Telekom
	13.30	D2		Sunstriders v Kurti Andra
	15.00	D1		Milne Bay Utd v GeeOtton

**MOROBE COUNTRY RUGBY LEAGUE PRESENTS 1997 GRAND FINAL DRAWS**

Date: September, Sunday 14, 1997.  
 Venue: Omili Sports Centre  
 Time: 10.30am (Gate Opens)

1130am	U19	Juniors K/Jets vs Wests
01.30pm	B	K/Jets vs Tent City Rangers
03.30pm	A	Pirates vs Tent City Rangers
05.00pm		(Final speeches and presentation)

"Highlights singsing groups  
 Music and lucky tickets with lots of fun

Fees: Adults K2.00




Kids: K1.00

Mutrus kick for goal

All welcome at Omili Oval



# WANTOK SPOT



## Kundiawa Warriors aut long inta siti

HENRY MORABANG i raitim

### ...Ben Bire i kisim 15 yia saspensen

PAPUA Niugini Ragbi Futbal Lig (PNGRFL) i saspensim Kundiawa Warriors tim long tupela yia na tripela pilaia bilong en long 21 yia olgeta.

Las wik long miting bilong Judiseri Komiti bilong PNGRFL, komiti i painim olsem olpela Kumulowat Ben Bire i as bilong trabel wantaim referi Tony Kuni.

Bire i bin raunim Kuni bihain long mesa fainol bilong inta siti gem namel long Lae Bombers na Kundiawa Warriors long Ogas 24 na bihain pul nek bilong siof na ol arapela pilaia i paitim referi. Lae

Bombers i winim dispela gem 14-6 na ol i pilai wantaim Mt Hagen Eagles na ol i lus.

Aninit long seksen 19.2 (N) bilong ol konstitusen, Bire i mekim rong na komiti i saspensim em long 15 yia. Insait long dispela yia, em i no inap holim wok olsem opisal o edministreta inap tripela yia i pinis.

Komiti tu i saspensim tupela arapela pilaia Michael Pagau na John Kumo. Komiti i saspensim tupela long tripela yia.

Judiseri Komiti i painim olsem Pagau em i namba wan man long

tromoi han long referi Kuni na Kumo i kirapim bel bilong ol man long pait na bagarapim gutnem bilong PNGRFL.


Namba foa pilaia em Ezekiel Ben i nogat witnes olsem na em i laki. Tasol komiti i mekim strongpela tok lukaut olsem sapos nem bilong em i kamap long ai bilong komiti, em bai kisim strongpela mekim save.

Judiseri Komiti i saspensim Kundiawa Warrior long tupela yia bihainim lo bilong lukautim ol Tim aninit long seksen 19.3.

Na tu Kundiawa Warriors i gat nem nogut long arapela trabel bipo na olsem PNGRFL i no gimim sans, em i saspensim tim tasol.

Na tu komiti i mekim strongpela tok olsem ol pilaia i stap long dispela saspensen i noken pilai wantaim long wanpela tim.

Judiseri Komiti i mekim strongpela tok lukaut long ol pilaia, ol opisal na ol klap olsem sapos ol i mekim dispela kain pasin, ol tu bai kisim taim. Na dispela pasin em long mekim ragbi lig i kamap gutpela gem long lukim



• Ben Bire.

MARGARET MUNJIN i raitim

## Yuni makim PNG long Pan Pasifik Kap

YUNIVESITI soka klap long Mosbi i bukim pinis si bilong balus long raun na stap insait long kik resis bilong Pan Pasifik Kap nekis yia. Ol bai Mosbi bai makim PNG long kik resis wantaim ol sempion klap bilong 10-pela arapela kantri insait long Osenia na Asia rjon.

Pan Pasifik Kap em rupela resis we Osenia Futbal Konfederesen (OFC) i statim long taim strongim stended bilong soka insait long Osenia na Asia rjon. Win bilong Pan Pasifik Kap bai go stap insait long bikpela kik resis long Yurop we ol biknem soka klap tasol i save resis long em. Yunivesiti i autim Babaka 3-0. Presiden bilong PNGFA Peter Mommers i tok amamas long Yunivesiti long kamapim gutpela soka gem long Madang. Em i tok kain stall bilong Yunivesiti i wankain olsem ol stall bilong ol klap long Inglan. Mommers i sapotim Yunivesiti long stap insait long kik resis bilong Pan Pasifik Kap. Em i tok em i no save dispela tonamen bai kamap long wanem hap. Em i amamas tru olsem Yunivesiti bai karim pilak bilong PNG taim em i go kik ovasis.

Mommers i bin mekim dispela toktok long presen-tesen bilong ol tropi na awot bihain long gren fainol. Em i tok amamas tu long Babaka. Babaka em wanpela viles tim insait long Sentral provins tasol ol i save pilai long bikpela soka kompetisen long Mosbi siti. I tru, planti bilong ol pilaia em bilong ples, tasol kain stall ol i pilai i soim tru olsem ol i ken pilai soka long bikpela tonamen olsem nesanel klap sempionsip.

Babaka i kisim K400 na wanpela tropi long kamap namba tu long Yunivesiti.



## CAMBRIDGE KAP PAINIM BAL RESIS



Ol wokmanmeri bilong Word Publishing na Kalang FM i no inap pilai long dispela resis.

Makim X long wanem hap bilong piksa yu ting bal i stap long en. Na salim resis bilong yu i go long dispela adress:

**Cambridge Kap Painim Bal Resis  
KALANG FM  
P.O Box 1534, Boroko**

na bai yu gat sans long winim get ticket long lukim wanpela pilai bilong Cambridge Kap long wanem hap ol i pilai long en.

Resis bai i ran inap 5-pela wik. olgeta na long wan wan Raun bai i gat prais bilong em yet inap igo long winim tupela-we balus tiket long lukim gren fainal long wanem hap ol i pilai long en.

Bai ol i singautim nem bilong husat man o meri i win long **KALANG FM REDIO**.

Hariap na salim resis bilong yu na bai yu gat sans long win!

### WINIM PRAIS

1. I gat 5-pela ten (50) get tiket long winim long wan wan wik long lukim pilai bilong Cambridge Kap long wanem hap ol i pilai.
2. Winim tupela-we balus tiket bilong yu i kam long lukim GREN FAINAL pilai na go bek long wanem hap yu kam long en.

Putim nem na adress bilong yu hia.

Nem:.....

Adres:.....

Telepon:.....

SALIM KWIK RESIS BILONG YU LONG WINIM PRAIS BILONG RAUN-WAN PILAI LONG SARERE 21/9/97



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.